

SAYIKEREWA bo Yesu yi kereeri YOHANE ni

¹ Ahin jɔrɛ n ye Nyɛmɛ seeri Yesu Kristo ka i yi kere i akɔɔm fa kɔ sam bo i cɛ má na bu bá yo n a. Na Yesu asunma i merɛkɛ i akɔɔ Yohane dɔ, na i kɔ se i jɔrɛ ni. ² Jɔrɛ n bo Nyɛmɛ ni Yesu Kristo yi kereeri Yohane na i ɲuuri i ni, nyini ye wɔ di i daani akɛrɛ i n a.

³ Sɔnɔ kere bo i kaanri ahin kadasi ni, terefie wo i dɔ. Na minem kere bo bu tiiri i jɔrɛ na bu deeri i, terefie wo bu dɔ, dama sanɓa n adodo bo nyini sam kere bá yo.

Kabo Yohane kerɛeri kadasi yoori Kristo jama n anse ni

⁴⁻⁵ Mini Yohane akɛrɛ ahin kadasi n na m fa ma Kristo jama asese nso n bo bu wo Esiya awɔrɛ n nu n a. Nyɛmɛ bo i wo bere, na i yo woori bere, na i bá wo bere sanɓa kere ni, ni i awiewie busu nsom n bo bu wo yiri Nyɛmɛ kpiri n nyunu ni ma am ahoreda, na am di bu ahɔrɔma. Bekun, Yesu Kristo, yiri bo i di i daani na i la dabuɲu ni, na yiri ti bo i du mɔ tengeeri yiwee nu ni, na i kaaki ti durunya n nu nfemem kere tii ni, ma am ahoreda, na am di i ahɔrɔma. Yiri koro ya, na wɔ fa i mbunja ade ya afite ya satie kere nu, ⁶ na wɔ yo ya i femɛya n nu minem na ya yo i sayoowa dɔɲguyofɔm, na ya su i Si Nyɛmɛ. Yiri Yesu Kristo ni, yiri ti ye ni ka ya wura i kpiri a, i dɛɛ la yiko sanɓa kere. Ami.

⁷ Am niɛ, i fite angoro yinyiɲgu n nu ba,

na sɔnɔ kere nyumbaa bá ɲu i,
fa sanga ni minem bo bu wɔori i kpɛ n kere.

Yiri ti, durunya n nufɔm kere sún.

I ti sɔ ɔ. Ami.

⁸ Ya Mi Nyeme Feme Kpiri bo i wo bere ni, na i yo woori bere, na i bá wo bere sanga kere n ase ka, “Mini ti mɔfɔ a, na m kaaki ti kasinfɔ.”

Kabo Yohane ɲuuri Kristo ka alele nu ni

⁹ Mini Yohane ti am niwa bo m ni ambere kere sanga di wahara ni mindi Yesu deɛ ti, na ya ti i femeya n nu minem ni. Nyeme noanie n bo ma kan i ni, ni Yesu daani n bo ma di i n deɛ ti, na ba fa m akɔ aji mie be bo i wo lui bambaka n bo i wo tieku n nu na bu fere i ka Patamosi n su. ¹⁰ Ya Mibie n deɛ cɛen ni, na Nyeme Awiewie Casi n awura m ɲu, na ma ti akonvi bambaka be ɲga m sin, ka awie deɛ su. ¹¹ Na wɔ se m ka, “Kere deke n kere bo a ɲú i n wura kadasi n nu, na a fa ma Kristo jama asese nsom bo bu wo ahin mie kpirim n su ni, bere la Efeso, ni Samirina, ni Perɛgamon, ni Tiyatira, ni Saradisa, ni Filadɛlefɛiya, ni Lawodikaya.”

¹² Na ma ce anie m sin ka m ɲu sɔnɔ n bo i jojo m do ni, m ce nieeri ni, na ma ɲu fitana takaabiri nsom bo bu ti sika ni. ¹³ Na ma ɲu be ka adamande wa ni, i wo bu aɛen, i wura tanleɛ tintiin yorom, na wɔ fa sika dambara abo i hoe su. ¹⁴ I tiɲmie kere ti fofoe papasi ka gise wɔ, na i nyumbaa kere je ka sin fofoe. ¹⁵ Na i jaa gbagbaa kere boro ka jawii bo ba fa awura sin nu na wɔ boro sonsoen, na i konvi bo awie kabo nzue beberebe songi na i bo awie barasu ni. ¹⁶ I bita asarambaam nso i saa fɔmbɔrɔ nu, na takobe

nana afite i nɔɔ nu. I nyunu je kabo wiε ba bi na i je n wɔ.

¹⁷ M ηuuri i sɔ ni, na ma kaba ada i jaa bu asiεnɔgu ka ma wu dεε su wɔ, na wɔ fa i saa fɔmbɔrɔ anana m ηu, na wɔ se m ka, “Má a soro sεrε. Mini ti deke kεrε bumboori ni i awieeri a. ¹⁸ Mini ti bo i wo bεrε sanɔa kεrε n a. Niε fεn. M yo wuuri wɔ, ama, kisa, ma tenɔge yiwee nu. M la ηɔɔ bo i la má awieeri. Mini bita yiwee ni Yiweefɔm Woobiri kadombaa a. ¹⁹ Nyini ti, kεrε sam bo a ηu bu ni, ni bo bu suyo kisa ni, ni bo bu bá yo ahin dεε sin ni. ²⁰ Asarambaa nsom bo a ηu bu m saa fɔmbɔrɔ n bu la ka, Kristo jama asεsε nsom n mεrεkem. Na fitana takaabiri nsom bo bu ti sika ni gusu bu la ka, Kristo jama asεsε nsom ni.”

2

Nɔɔniε n bo bu fa maari Kristo jama n bo i wo Efeso ni

¹ Na wɔ se m ka, “Kεrε kadasi fa ma mεrεkε n bo i niε Kristo jama n bo i wo Efeso miε kpiri n nu ni, na a se bu ka, ‘Ahin nɔɔniε n fite mini bo m bita asarambaa nsom m saa fɔmbɔrɔ nu ni, na m kaaki nati fitana takaabiri nsom bo bu ti sika n afiεn n dɔɔ. ² M si am sayoowam, m si kabo am ayo am juma ni anyumboro barasu, ni kabo am la mindi barasu ni, na m si kabo am de má satieyofɔm ni. Na m kaaki si kabo am ayi kɔrɛsi aɔu minεm bo bu ηa bu ti m jamasam, ama, bu woowa kere ka bu ti má sɔ, na am aɔu ka bu ti kɔrɛfɔm ni. ³ Mini dεε ti, am ayo sawɔrε

amindi am wahara nu, am nya fie má, am toko su m su.

⁴ Ama, jɔɔɛ kun bo m fa jaraki am la ka, kisa am koro má m kabo am yo koro m ni. ⁵ Nyini ti, am bu am tii nu fɔ na am si deke bo am akpaasi ni, na am kaaki am wo, na am yo sam bo am yoori bu bumboori ni. Nzen am akaaki má am wo, m bá cin yi am fitana takaabiri n deke bo i taka ni.

⁶ Ama, am sa kun bo i yo m fie n la kabo am koro má Nikolaitafɔm sayoowam ni, mini mmɔɔ koro má bu sayoowam ni.'

⁷ Sɔnɔ kɛɛ bo i koro ka i ti ahin jɔɔɛ n bu, i ti ye ni ka i mi so i sui na i ti kabo Awiewie Casi ni suse Kristo jamam barasu ni. Sɔnɔ kɛɛ bo i di nasara, m má i atin na i di baka n bo i ma ɲɔɔ n dɛɛ suuwa na i wo Nyeme dika n nu ni."

Nɔɔniɛ n bo bu fa maari Kristo jama n bo i wo Samirina ni

⁸ Na wɔ se m ka, "Kɛɛ kadasi fa ma mɛɛkɛ n bo i niɛ Kristo jama n bo i wo Samirina miɛ kpiri n nu ni, na a se bu ka, 'Ahin nɔɔniɛ n fite mini bo m ti deke kɛɛ bumboori ni i awieeri ni, na m yo wuuri na ma tenge yiwee nu ni dɔɔ. ⁹ M si kabo am adi wahara agaya barasu, ni kabo am ti yaarifɔm ni, ama, am ti nengefɔm wɔ Nyeme dɔ. Na m si kabo minem kpiɛ am nzukɔ ni, bo bu yo bu ɲu ka bu ti Yudafɔm, ama, bu ti má Yudafɔm ɲɔɔ, bu ti Sitana dɛɛ jama n wɔ. ¹⁰ Am dí wahara kisa, ama, má am soro sɛɛ. Am ti fɛn, Sitana wúra am nbem saraka na i yó am na i níɛ na am ɲú kekereke leburu. Ama, am su m ni nahɔɛ haari am bá wu, na m tó am ɲkatɔ, yiri la ɲɔɔ bo i la má awieeri n a.'

¹¹ Sɔnɔ kɛrɛ bo i koro ka i ti ahin jɔrɛ n bu, i ti ye ni ka i mi so i sui na i ti kabo Awiewiɛ Casi ni suse Kristo jamam barasu ni. Sɔnɔ kɛrɛ bo i di nasara nɔ́ má yiwee kpe nnyɔ su n kun.”

Nɔ́aniɛ n bo bu fa maari Kristo jama n bo i wo Pɛrɛgamon ni

¹² Na wɔ se m ka, “Kɛrɛ kadasi fa ma mɛrɛkɛ n bo i niɛ Kristo jama n bo i wo Pɛrɛgamon miɛ kpiri n nu ni, na a se bu ka, ‘Ahin nɔ́aniɛ n fite mini bo m la takobe nana n dɔ ɔ. ¹³ M si deke bo am woori ni, am woobiri n ti Sitana fɛmɛya tanaabiri wɔ, ama, am toko su m ni nahɔrɛ wɔ, am ayaki má m yaradayo, haari ni sanɔa bo bu kuunri Antipasi bo i diiri m daani nahɔrɛ su am miɛ n nu, deke bo Sitana wo ni. ¹⁴ Ama, m la jɔrɛ nbem bo m fa jaraki am, am nbem bita Baalam kereewa atin n wɔ. Yiri yo kereeri Fɛmɛ Balaki, ye i maari Yisarelifɔm yoori satie diiri tie niɛ, na ba yo sakaraya. ¹⁵ Am nbem gusu ti sɔ ɔ, bu su Nikolaitafɔm dɛɛ atin kereewa n su wɔ. ¹⁶ Nyini ti, am kaaki am wo, má nyini, m bá am dɔ kisa, na m fá takobe n bo i wo m nɔɔ nu kun lue ni minem bo bu yo sɔ ni.’

¹⁷ Sɔnɔ kɛrɛ bo i koro ka i ti ahin jɔrɛ n bu, i ti ye ni ka i mi so i sui na i ti kabo Awiewiɛ Casi ni suse Kristo jamam barasu ni. Sɔnɔ kɛrɛ bo i di nasara, m má i mi diire n bo bu fere i ka *mana* * ni, na i wo fiɛwa nu ni. Na m káaki ma i mi yabuɛ fofoe be, ba kɛrɛ duma fɔfɔrɛ su, be koro si má duma n bo i wo su ni, má ka yiri n bo i de i ni si i a.”

Nɔani n bo bu fa maari Kristo jama n bo i wo Tiyatira ni

¹⁸ Na wɔ se m ka, “Kere kadasi fa ma mereke n bo i nie Kristo jama n bo i wo Tiyatira mie kpiri n nu ni, na a se bu ka, ‘Ahin nɔani n fite mini Nyeme Wa n dɔ ɔ, mini bo m nyumbaa je ka sin fofoe, na m jaa gbagbaa kere boro ka jawii dee su ni. ¹⁹ M si am sayoowam, m si kabo am la koro barasu, ni kabo am su m ni nahore su ni, ni amusui bo am su i ni, na m kaaki si kabo am la mindi, na m si kabo kisa am boro am nyi tara bumboori ni.

²⁰ Ama, jɔre bo m fa jaraki am la ka, am amɔ am nɔɔ ye am nie Yezebeli, bara n bo i yo i ɲu ka i ti Nyeme nɔani kanfo ni. I kere m akoom wɔ na i daka bu, na bu suyo sakaraya, na i ma m minem di tie nie. ²¹ Ma se i ka i kaaki i wo na i yaki somaya ko ni, wo kete ka i kaaki ma. ²² Nyini ti, m ma i da tukpaki kekereke, na i ni minem bo bu yo sakaraya n di wahara agaya, nzen ba kaaki ma bu wo ayaki ma sam bo bu ni yiri yo bu ni. ²³ Na m kun i nbaam, na Kristo jama asese n kere si ka, mini fiiti si deke bo i wo sɔnɔ kere ahore su, ni i sunsunni nu. Na m fa sɔnɔ kere sayoowa to i kaari.

²⁴ Ama, ambere Tiyatirafom nbem bo am aka, na am su ma i kereewa atin n su ni, ambere asonson ma deke bo nbem fere i ka Sitana asiri nu sa bambaka ni. M suse am wo lee, m so ma am sɔori nɔnɔori buka ma su. ²⁵ Ama, atin bo am bita i ni, am bita i kenken haari sanja bo m ba kaaki ba.

²⁶⁻²⁸ Sɔnɔ kere bo i di nasara na i yo m sa koroowa ko juuri awieeri, m ma i yiko kabo m Si

ama m yiko ni, na i níe daanfíe daanfíe kere su. Na i bíta bu kekereke kabo nanƙasi fa bulaari kɔrɔma tu bo i naanim barasu ni, na i fúfu bu kabo bu fufu yakatise barasu ni. Na m má i asaakojo.’ ²⁹ Sɔnɔ kere bo i koro ka i ti ahin jɔre n bu, i ti ye ni ka i mi so i sui na i ti kabo Awiewie Casi ni suse Kristo jamam barasu ni.”

3

Nɔanie n bo bu fa maari Kristo jama n bo i wo Saradisa ni

¹ Na wɔ se m ka, “Kere kadasi fa ma merɛke n bo i nie Kristo jama n bo i wo Saradisa mie kpiri n nu ni, na a se bu ka, ‘Ahin nɔanie n fite mini bo m la Nyeme awiewie busu nso n na m bita asarambaam nso m saa nu dɔɔ. M si am sayoowam, am wo ka am la ηgɔɔ, ama, am ti fuinm wɔ. ² Nyini ti, am yasu na am bita deke n bo am toko la i n kenken, má nyini, i wú wɔ. Dama ma ηu ka am sayoowam n akpie su Nyeme dɔ. ³ Am tenge su, kabo am yo tiiri Nyeme nɔanie n na am deeri i ni, am kaaki am wo na am bita i, nzen am ayasu má, am si má sanƙa bo m bá ni, dama m bá fura am nu ka awiefɔ dɛɛ su wɔ.

⁴ Ama, m la mine nbem bo bu wo Saradisa Kristo jama n nu, bo ba saaki má bu sutura ayo má bu fin, bu sayoowam nu. Bere bá wura tanlee fofoe na m ni bere sanƙa nati a, dama bu ti ye ni sɔɔ. ⁵ Sɔnɔ kere bo i di nasara, i wúra nyini tanlee fofoe n be sɔɔ. Na m yí má i mi duma fite má ηgɔɔ kadasi n nu, ama, m bá jina m Si ni i merɛkem nyunu, na m sé bu ka i ti m dɛɛ sɔnɔɔ.’ ⁶ Sɔnɔ kere bo i koro ka i ti ahin jɔre n

bu, i ti ye ni ka i mi so i sui na i ti kabo Awiewie Casi ni suse Kristo jamam barasu ni.”

Nɔaniɛ n bo bu fa maari Kristo jama n bo i wo Filadɛlɛfiya ni

⁷ Na wɔ se m ka, “Kɛɛ kadasi fa ma mɛɛkɛ n bo i niɛ Kristo jama n bo i wo Filadɛlɛfiya miɛ kpiri n nu ni, na a se bu ka, ‘Ahin nɔaniɛ n fite mini bo m ti casi na m ti nahɔɛfɔ, na m bita Fɛmɛ Davidi kadombaa n bo i kere ka m la i dɛɛ yiko n be wɔ, na nzen m tekeeri anɔ, be koro tu má i, na nzen m tuuri i gusu, be koro teke má i. ⁸ M si am sayoowam, am niɛ, ma teke anɔ ama am bo be wo má bɛɛ bo i koro tu i. M si ka am la má fanɔga agaya, ama, haari ni nyini mmɔɔ, am fite má m sin, am toko bita m nɔaniɛ n ni nahɔɛ wɔ. ⁹ Am yaki bo bu su Sitana n na bu yo bu ɲu ka bu ti Yudafɔm ni, bu ti kɔɛfɔm wɔ, bu ti má Yudafɔm ɲgba. M má bu ba kutu am nyunu na bu si ka m koro am. ¹⁰ Am ade m nɔaniɛ ni, na am amindi n dɛɛ ti, m yí am fite kekereke n bo Nyemɛ bá fa yo durunya n nufɔm kɛɛ na i niɛ ni.

¹¹ M cé má, m káaki ba kisa. Atin n bo am bita i ni, am bita i kenken na má be fin am ɲkatɔ ni. ¹² Sɔnɔ kɛɛ bo i di nasara, m fá i yo jantarka Nyemɛ Sereebiri Awuru n nu na i wó nu dɔ sanɔga kɛɛ. Na m kɛɛ Nyemɛ duma mata i, na m kɛɛ Nyemɛ miɛ n duma, miɛ n bo i fite anɔgoro Nyemɛ dɔ na bu fere i ka Yerusalem fɔfɔɛ, na m káaki kɛɛ m duma fɔfɔɛ n gusu mata i mi ɲu.’ ¹³ Sɔnɔ kɛɛ bo i koro ka i ti ahin jɔɛ n bu, i ti ye ni ka i mi so i sui na i ti kabo Awiewie Casi ni suse Kristo jamam barasu ni.”

Nɔani n bo bu fa maari Kristo jama n bo i wo Lawodikaya ni

¹⁴ Na wɔ se m ka, “Kere kadasi fa ma merɛke n bo i niɛ Kristo jama n bo i wo Lawodikaya miɛ kpiri n nu ni, na a se bu ka, ‘Ahin nɔani n fite mini bo m ti Ami na m la dabuɔ, na m di daani ni nahɔre su n dɔɔ. Mini ni Nyeme du mo yo woori bere a, ye ya yiiri deke n kere a. ¹⁵ M si am sayoowam, am ti ma niniki, am kaaki ti ma kɛkɛre, nzen ma am ti niniki wara kɛkɛre, ma m koro. ¹⁶ Ama, am ti boboroki n deɛ ti, m pɔuti am m nɔɔ nu butu. ¹⁷ Am ɔa am ti nengefom wɔ, deke be kpie ma am su, ama, am si ma ka am la aɔunfo, na am si ma ka am ti yaarifom, na am kaaki si ma ka am ti anyinsinm, na am kaaki si ma ka am nati am ɔuniɛ ɔgbɛɛn wɔ. ¹⁸ Nyini ti, m koro ka m tu am fo, na am bra m dɔ ba to sika kpa bo ba fa awura sin nu na wɔ fite casi ni, adena am yo nengefom nahɔre su, na am ba to sutura fofoe m dɔ, na am fa kata am ɔu, na ma mine ɔu ka am nati am ɔuniɛ ɔgbɛɛn na i la nyinse. Na am ba to anyumbaa ayiri m dɔ, na am fa wura am nyumbaa nu na am koro ɔu asi nyunyumi. ¹⁹ Bo m koro bu ni, bere ye m jaraki bu na m cin bu sui a, nyini ti, am boro am nyi na am kaaki am wo. ²⁰ Am ti fen, m jina sɔɔ aɔ n sin subobo, sɔɔ kere bo i ti m konvi ɔga na i tekeeri aɔ ni, m ba wura i mi dɔ, na m ni yiri saɔga di diire.

²¹ Sɔɔ kere bo i di nasara, m ma i atin na i ba tana m bi m femeya bie n su, kabo ma di nasara na m ni m Si saɔga tana i femeya bie n su ni.’

²² Sɔɔ kere bo i koro ka i ti ahin jɔre n bu, i ti

ye ni ka i mi so i sui na i ti kabo Awiewie Casi ni suse Kristo jamam barasu ni.”

4

Kabo bu su Nyeme i femeya n nu barasu ni

¹ Nyini sin, na wo yo m ka alele dee su, na ma nu ka ano be ateke angoro. Na ma ti akonvi nga ka awie dee su sujɔɔ m do, i ti akonvi n bo i du mo jɔɔori m do n wo. I na, “Fun bra angoro fen, na m kere u sam bo bu ba ya ahin sin.”

² Jina nu n bere na Awiewie Casi n aba awura m nu na ma nu ka femeya bie wo angoro, be tana su. ³ Bo i tana femeya bie n su je piepieu kabo cenceri nbem je barasu wo, nbem je fofoe na nbem je kɔkɔre, na i femeya bie ni, deke be je piepieu angoro kabo nzue ba muna na ayi kpie nu ni. ⁴ Femeya bie aburanyo ni nna nbem taka bara ye i femeya bie ni, na nkpienkpienm aburanyo ni nna tana biem su, bu wura tanlee fofoem na bu butu sika kere. ⁵ Na femeya bie ni sukpeɛ ka nzue dee su, na i sutiɛntien, na i suyo nanmie. Fitana nso taka femeya bie n nyunu wo je su, bere la Nyeme awiewie busu nsom ni. ⁶ Deke be gusu da femeya bie n nyunu ka nzue bambaka dee su, i nyunu da cain ka nieɛnu wo.

Deke ngɔɔfo nna nbem gusu abara aye femeya bie ni, bu la anyumbaa beberebe, bu nyunu ni bu sin n kere. ⁷ Ciciri su dee n ti ka jara a, nnyo su n ti ka toora, nsan su n nyunuawa ti ka adamande wo, na nna su n ti ka kajiri bo i sutu landi. ⁸ Bu kun kun kere la lanjpete nsen nsen wo, bu la anyumbaam bu nuniɛmbaa nu,

ni bu ηunie kere su. Na bu sudi jue kɔŋgue ni wiesu kere, ka,

“Casi, casi, casi la ya Mi Nyeme Feme Kpiri,
i yo woori bere, na i toko wo bere, na i bá
wo bere sangá kere ni.”

⁹ Nzen bu nya sudi jue na bu fa kansi, ni jirima, ni anse ma yiri n bo i tana femeya bie n su ni, na i wo bere sangá bo i la má awieeri ni, ¹⁰ nyini sangá, a ηu ka nkpienkpienm aburanyo ni nna n sukutu i nyunu, na bu su i, yiri bo i wo bere na i la má awieeri na i tana femeya bie n su ni. Na bu yi bu kere, sufa se femeya bie n nyunu, na bu sudi jue, ka,

¹¹ “Ya Miceera ni ya Nyeme, wɔɔɔ ti ye ni ka
a de kansi a, ni jirima, ni yiko.

Dama wɔɔɔ yiiri deke n kere a,
u koroyanu ye a maari deke n kere la
ηɔɔ a.”

5

Kadasi n ni Bɔmbaa n jɔre

¹ Na ma ηu ka kadasi nyanyaawa be wo yiri n bo i tana femeya bie n su n saa fɔmbɔɔ n nu, kereewa wo i kunnu ni i sin kere su, ba fa wie mene amie amata i busu nso. ² Na ma ηu Nyeme mereke fangafɔ be ka i subo ndoori fanga su ka, “Nma ti ye ni bo i koro cin ηmanɔi wie mene n na i teke kadasi n a?”

³ Ama, aŋgoro, ni asienɔgu, ni bo bu wo asien bu, be awo má bere bo i koro teke kadasi ni, na a ba kan ka i koro nie nu. ⁴ Be awo má bere bo i ti ye ni bo i koro teke kadasi ni, na a ba kan ka i koro nie nu n dee ti, na ma sun ni nyunvuin

ngba. ⁵ Na nkpienkpienm n nu kun, ase m ka, “Má a sun. Nie fen, Feme Davidi anuma kpiri ni, bo bu fere i ka Yudafoṃ busu nu jara n adi nasara, i koro cin ṅmaṅgi wie mene nso n na i teke kadasi ni.”

⁶ Na ma ṅu bōmbaa be, i ti ka ba kpie i kōm wō, i jina femeya bie n afien. Deke ṅgōṅṅō nnam, ni nkpienkpienm n abara aye i. I la mbie nso wō, i nyumbaa gusu ti nso wō. Bere la Nyeme awiewie busu nsom bo wō sunma bu durunya n kere nu ni. ⁷ Na wō kō yiri n bo i tana femeya bie n su n dō, na wō de kadasi n afite i saa fōmbōṅṅō nu. ⁸ I kō deeri kadasi n ni, na deke ṅgōṅṅō nnam, ni nkpienkpienm aburanyō ni nnam n akutu i nyunu. Bu kere la bieku, na bu kere bita sika ayaba bo wō yi ni ayiri kunkuunwa nvanvani ṅgumi wō. Ayiri kunkuunwa nvanvani n ti nyemesere bo Nyeme dēe mine sere i wō. ⁹ Na ba di jue fōfōre ama yiri Bōmbaa n ka,

“Wōṅṅō ti ye ni ka a de kadasi ni,
na a ṅmaṅgi wie mene n a,

dama wōṅṅō ye bu kpieeri u kōm, ye a fa u mbunja
ade minem tii aji a.

Adamande kere, ni daanfie kere, ni aniem
kere,

ni asien barasu barasu kere bo bu wo du-
runya n nu ni,

bu nbem ayo Nyeme dēe minem.

¹⁰ A fa bu ayo u femeya n nu minem,
na bu yo u sayoowa dōṅguyofōṃ,
na bu nie durunya n kere su.”

11 Na ma niε aηu Nyεmε mεrεkεm beberebe, akpii akpii buru nɔ, ka, ba bara ayε fεmεya biε ni, ni deke ηgɔɔfɔ nnam, ni nkpienkpienm ni. Na ma ti ka ¹² ba ye bu konvi su sudi jue, ka, “Bɔmbaa n bo bu yo kpieri i kɔm ni, yiri ti ye ni ka i de yiko a, ni neηge, ni alecira, ni faηga, ni jirima, ni kpiri, ni kansi a.”

13 Na ma ti ka deke kεrε bo bu wo aηgoro, ni asienηgu, ni bo bu wo asien bu, ni bo bu wo nzue nu, ni deke kεrε bo Nyεmε ayi bu, ka bu sudi jue, ka, “Yiri n bo i tana fεmεya biε n su n ni Bɔmbaa ni, bere ti ye ni ka bu de kansi a, ni jirima, ni kpiri, ni yiko, saηga kεrε saηga.”

14 Na deke ηgɔɔfɔ nnam n ase ka, “Ami.” Na nkpienkpienm n akutu asu Nyεmε ni Bɔmbaa ni.

6

Wie mεne bo bu fa mata kadasi n jɔrε

1 Na ma ηu ka Bɔmbaa n aba acin aηmaηgi wie mεne nso n bo bu fa mataari kadasi n nu kun. Na ma ti deke ηgɔɔfɔ nnam n nu kun konvi ηga, kabo nzue tientien barasu ni, ka, “Fite.”

2 M niεri na ma ηu ka, kpɔηgɔ fofoe lεε. Bo i fun i n bita taa ni awiε, na ba butu i fεmεya kere, na wɔ kɔ ka luekunfɔ na i di nasara.

3 Na Bɔmbaa n acin aηmaηgi wie mεne nnyɔ su ni, na ma ti ka deke ηgɔɔfɔ nnyɔ su ni suse ka, “Fite.”

⁴ Na kpɔŋɔ kɔkɔrɛ afite, na ba ma i funfɔ n takobe tintiin, na ba ma i yiko ka i yi tanalaifɛ fite durunya n nu, na minɛm kun bu bengum.

⁵ Na Bɔmbaa n acin aɲmɔŋgi wiɛ mɛnɛ nsan su ni, na ma ti ka deke ŋɔɔfɔ nsan su n suse ka, “Fite.”

M niɛeri na ma ŋu ka, kpɔŋɔ biri lɛɛ. I funfɔ n bita deke bo bu bita sunsun diire ni i saa nu. ⁶ Na ma ti akonvi be ŋga deke ŋɔɔfɔ nnam n nu, i ŋa, “Ŋgani ayaba ŋgboroko kun ti jumayofɔ lekun ŋkatɔ ɔ. Na abuwe ayaba ŋgboroko nsan ti jumayofɔ lekun ŋkatɔ. Ama, má am saaki ŋguin ni nzan ni.”

⁷ Na Bɔmbaa n acin aɲmɔŋgi wiɛ mɛnɛ nna su ni, na ma ti ka deke ŋɔɔfɔ nna su n suse ka, “Fite.”

⁸ M niɛeri na ma ŋu kpɔŋɔ nzuin faa, i funfɔ n duma la Yiwee, na bo bu fere i ka Yiweefɔm Woo-biri n gusu su i su. Na Nyɛmɛ ama bu durunya kpaaki nu nna buekun yiko ka bu fa luɛ, ni ahɔɛ, ni tukpaki, ni boro nɛngɛndɔrɛ tiɛm, na bu kun bu.

⁹ Na Bɔmbaa n acin aɲmɔŋgi wiɛ mɛnɛ nnu su ni, na ma ŋu minɛm awiewiɛ Mikun yoowa yoobiri n bu, bɛrɛ la minɛm bo bu yo kuunri bu fa kɔ bu Nyɛmɛ jɔrɛ kaanwa, ni bu daani diiwa n dɛɛ ti. ¹⁰ Na bu sutien faŋga su ka, “Ya Mi Nyɛmɛ Fɛmɛ casi, nahɔrɛfɔ, cɛɛn nzu ye a dí minɛm bo bu yo kuunri ya n jɔrɛ na a cín bu sui ma ya?”

¹¹ Na Nyɛmɛ awura bu kun kun kɛrɛ sutura fofoe, na wɔ se bu ka, “Am yi am ŋumi kaan ka, na bu bá kun am beŋgu akɔɔm, ni am beŋgu

Kristofom kere ko wie ka, kabo bu yo kuunri am barasu ni, na m dí bu jore.”

¹² Na ma nu ka Bombaa n acin anmangi wie mene nsen su ni, na asien akpisi fanga su, na wie akaaki biri didiki ka nambiri numa, na sara n akaaki kokore ka mbunja dee su. ¹³ Na asarambaam afite angoro ati atoto kabo anuma ba kpisi damba baka na i poorim titi toto barasu ni. ¹⁴ Na angoro n kere anyanya kabo bu nyanya bie ni, na wo mini, na bukam, ni nzue nu lui bambakam kere ayasu bu tanaabiri. ¹⁵ Na durunya n nu nfemem, ni tereterefom, ni soja nkpienkpienm, ni nengefom, ni nfangafom, ni akoom, ni sono kere ako afie yabue ngbingbirim buem nu, ni yabue bambakam bu, bukam su. ¹⁶ Na ba se ka, “Ma bukam bereki go ya nu, na ma yabue ngbingbirim kata ya nu, ma i ti ye, adena ma sono n bo i tana femeya bie n su n nu ya, na ma Bombaa n gusu cin ya sui. ¹⁷ Dama ceen bo Nyeme ni Bombaa ni cin sono kere sui n aju, ye nma koro jina bu nyunu a?”

7

Yisarelifom mine akpii yaa ni akpii aburana ni nna n jore

¹ Nyini sin na ma nu merkem nna, ka bu jina durunya n awore nna n kere nu na bu kanda anuma, na ma i kpie asien n su, ni tieku nu, wara i kpie go baka su. ² Na ma nu merke be ka i fite wie afiri, i bita deke be bo Nyeme bo i wo bere sanga kere n fa se i minem nyaari. Na wo tien fanga su ajojo merke nnam bo Nyeme ama bu

yiko ka bu saaki asien n ni tieku n do, ³ na wo se bu ka, “Má am se ka am saaki asien n ni tieku n ni bakam ni, má ka ya ba ase Nyeme minem kere numa su nyaari awie ka.”

⁴ Na wo kan minem bo ba se bu nyaari bu numa su ni, na wo kere m bu no, bu kere ko yasuuri mine akpii yaa ni akpii aburana ni nna a, bu fite Yisarelifom dee busu n kere nu wo.

⁵ Yuda dee busu nufom ti mine akpii buru ni akpii nnyo bo ba se bu nyaari, na Ruben dee busu nufom ti mine akpii buru ni akpii nnyo, na Gadi dee busu nufom ti mine akpii buru ni akpii nnyo.

⁶ Na Aseri dee busu nufom ti mine akpii buru ni akpii nnyo, na Nafatali dee busu nufom ti mine akpii buru ni akpii nnyo, na Manase dee busu nufom ti mine akpii buru ni akpii nnyo. ⁷ Na Simeyon dee busu nufom ti mine akpii buru ni akpii nnyo, na Levi dee busu nufom ti mine akpii buru ni akpii nnyo. Na Izaki dee busu nufom ti akpii buru ni akpii nnyo. ⁸ Na Zabulon dee busu nufom ti mine akpii buru ni akpii nnyo, na Yosefu dee busu nufom ti mine akpii buru ni akpii nnyo, na Benjamin dee busu nufom ti mine akpii buru ni akpii nnyo.

Jama beberebe bo ba nya tiide n jore

⁹ Nyini sin na ma nu jama beberebe, bu la má no, bu fite durunya asien n kere su, ni adamande kere nu, ni durunya daanfie n kere nu, ni durunya aniem kere nu, ka, bu jina yiri n bo i tana femeya bie n su n ni Bombaa n nyunu. Bu wura tanlee fofoe yorom, bu bita

kpakpa nyawam bu saa nu. ¹⁰ Na ba bo afere faṅga su ase ka,
 “Nyeme bo i tana femeya bie n su n ni Bombaa
 n ama ya nya ya tii a.”

¹¹ Na merékem n kere ajina abara aye femeya
 bie, ni nkpienkpienm, ni deke ṅṅofo nnam ni,
 na ba dada bu nyunu su asiṅgu Nyeme bo i tana
 femeya bie n su n nyunu, na ba su i. ¹² Na bu suse
 ka,

“Ami. Kansi, ni kpiri, ni alecira,
 ni anse, ni jirima,
 ni yiko, ni faṅga
 ti ya Nyeme dee wo sanḡa kere sanḡa. Ami.”

¹³ Na nkpienkpienm n nu kun abisa m ka,
 “Nmam ye a ṅu ka bu wura tanlee fofoe yorom
 n a, ye bu fite ni wo?”

¹⁴ Na ma se i ka, “M mibie, woro si a, mini si
 má.” Na wo se m ka, “Bere ti minem bo ba fite
 anyumboro kekereke nu n a, bere ye ba ṅmisi
 bu sutura Bombaa ni mbunja n nu ayo bu fofoe
 n a.

¹⁵ Nyini dee ti, ye bu jina Nyeme Sereebiri Awuru
 n nu,
 i femeya bie n nyunu ye bu su i kṅḡue ni
 wiesu n a,
 na Nyeme bo i tana i femeya bie n su n wó
 bu do na i yó bu kanda.

¹⁶ Ahoe ni nzuehoe tí má bu kun ceen be,
 wie bó má bu,
 na i kekere gusu wúra má bu.

¹⁷ Dama Bombaa n bo i wo femeya bie n afien ni
 yó bu sasafó a,
 na yiri fá bu ko bura nzue bo i tie
 na i ma ṅṅo bo i la má awieeri n a.

Na Nyeme núnuka bu nyunvuin kere bu nyunu.”

8

Wie mene nso su n jore

¹ Saŋga bo Bombaa n cin nmanjiiri wie mene nso su n ni, na deke kere ato amuna angoro n nu, haari miti aburasan.

² Na ma nu merere nsom bo bu jina Nyeme nyunu ni, na ba fa awie fitaawa nso ama bu.

³ Na ma nu merere nyinŋa ka i bita sika ayaba, bo bu fa ayiri kunkuunwa nvanvani go nu na bu kunkun i ni, na wo ko ajina Mikun n yoowa yoobiri n bi. Na ba ma i ayiri kunkuunwa nvanvani beberebe ka i fa buka Nyeme minem nyemesere su, na i fa kunkun Mikun yoowa yoobiri n bo bu fa sika mata su, na i wo femeya bie n nyunu ni. ⁴ Na ayiri kunkuunwa nvanvani n nmisini n ni Nyeme minem nyemesere n ayasu merere n saa nu afun ako Nyeme nyunu. ⁵ Na merere n ayi sin Mikun n yoowa yoobiri n su, na wo fa awura ayaba n nu, na wo yi, na wo fa atu asandi durunya n nu. Na nzue sukpara sutientien, na i sujeje, na i sukpepese, na asien n akpisi.

Awie nso n bo bu kan i n jore

⁶ Na merere nsom n bo bu bita awie fitaawam n asese bu nu su ka bu kan awiem ni.

⁷ Na merere n bo i du mo n akan i dee awie ni. Na nzue yabue, ni sin, saŋga ni mbunja ato durunya n nu, na sin aje durunya n kpaaki nu nsan buekun, ni bakam kere bo bu wo durunya n nu kpaaki nu nsan buekun, ni wura mone kere.

⁸ Na mereke n bo i to su nnyo su n akan i awie ni, na deke be, i ti ka buka bambaka wo, ye wo so sin su a, na ba fa i atu tieku n nu, na tieku n kpaaki nu nsan buekun akaaki mbunja.

⁹ Na deke ngoofoom kere bo bu wo tieku n nu kpaaki nu nsan buekun awu, na lee bambakam bo bu wo tieku n nu kpaaki nu nsan buekun gusu asaaki.

¹⁰ Na mereke n bo i to su nsan su n akan i awie ni, na asarambaa bambaka bo i je sin ka wura sin afite angoro aba ato kunmam ni nzuetinm bo bu wo durunya n nu kpaaki nu nsan buekun nu. ¹¹ Asarambaa n duma la Wiwi, na nzue n bo i wo durunya n nu n kpaaki nu nsan akaaki wiwi, nzue n ti wiwi n dee ti, na minem dongu bo bu nuuri nyini nzue n awu.

¹² Na mereke n bo i to su nna su n akan i awie ni, na deke be aba ato wie, ni sara, ni asarambaam kere kpaaki nu nsan buekun su asaaki bu, na ba kaaki biri tuum. Wiesu ni kongue n kpaaki nu nsan buekun, ayo ma wein.

¹³ Na ma nie, na ma nu ka kajiri be sulaandi tu angoro, na ma ti kabo i tien barasu ni, i na, "Oi, keto, keto, keto wo sono kere bo i wo durunya n nu n nu, kabo mereke nsanm bo ba ka n koro ka bu kan bu awiem ni, na bu tiiri."

9

¹ Na mereke nnu su n akan i awie ni, na ma nu ka asarambaa be afite angoro n aba ato asienngu. Na ba ma i kadombaa ka i teke kunma n bo i ko ngonngo na i la ma awieeri ni. ² Na wo teke nyini kunma n ni. I tekeeri i ni, na nmisini afite kunma n nu, i ti ka sin bambaka torowa

ɲmisini wɔ. Na ɲmisini n bo i fite kunma n nu n ama wiε ni angoro n kεε asi biri didiki. ³ Na lalom afite ɲmisini n nu asandi ade asien n su, na Nyεmε ama bu yiko, ka bundaanim dεε su. ⁴ Na wɔ se bu ka má bu di wura ni diire mbaa wara bakam, ama, bu kan minεm n bo bu la má Nyεmε anyaari seewa bu ɲuma su ni. ⁵ Wɔ ma má bu yiko ka bu kun minεm wɔ, ama, bu kere bu wahara sara nnu. Wahara ni ti kabo bundaani kan sɔnɔ na i yo ya n wɔ. ⁶ Nyini sanɓa ni, adamande sún kpini yiwee busu na bu wú, ama, bu nyá má i.

⁷ Lalom n ti ka kpɔŋɔm bo ba cici bu ka bu kɔ lue dεε su wɔ, deke be wo bu tii su, ka sika kere dεε su, na bu nyunuawa ti ka adamande dεε su. ⁸ Bu ndɔrε ti tintiin kabo bara bo i la tiɲmie tintiin ti n wɔ, na bu jee ti ka jara dεε. ⁹ Deke be kata bu hoe su pɛpɛrɛpɛ ka bulaari dεε su, na bu lanɓkpetεm suyo nanɲmie kabo kpɔŋɔm ni bu torokum n beberebe suɲmati kɔ lue na bu yo nanɲmie n wɔ. ¹⁰ Bu lɔ, bo bu fa kan n ti ka bundaani dεε su wɔ. Bu la yiko bu lɔ n nu, bo bu fa kere mine wahara sara nnu. ¹¹ Bu femε n la mεrεke n bo i niε kunma ɲɔŋɔ n bo i la má awieeri n su ni. Hiburu anie nu bu fere i ka, Abadon, ye Giriki anie nu bu fere i ka, Apolin, i bu la ka, saakifo.

¹² Tɔ. Ciciri su dεε ahoresaaki n asin, nnyɔ wo sin suba.

¹³ Na mεrεke nsen su n akan i awie n na ma ti akonvi be ɲga ka i fite Mikun yoowa yoobiri n bue nna n kεε, ba fa sika amata su na i wo Nyεmε nyunu ni. ¹⁴ Na akonvi n ajojɔ mεrεke

nsen su n bo i bita awie n do, i na, “Ko merere nnam bo bu wo kunma kpiri n bo bu fere i ka, Yufarati n do, na a nyanji bu ji.”

¹⁵ Na wo nyanji merere nnam bo ba du mo akpa bu nu anminda nyini een n gbingbin na bu kun mine bo bu wo durunya n nu kpaaki nu nsan bukun ni. ¹⁶ Na ma ti kabo bu sojam bo bu fun kpongɔ no ti, bu no ko yasuuri akpii akpii busu yaa nnyo o.

¹⁷ Deke n bo i yo m ka alele ni, m nuuri kpongom, ni bo bu fun bu ni, ka bulaari pɛpɛrɛpɛ be kata bu hoe su, nbem boro kokore ka sin wo, na nbem ti biri ka bura nzue, na nbem ti ka ndere nzue, kpongom tii dika ti ka jara tii wo. Na sin, ni nmisini, ni ferewita sufite bu noo nu. ¹⁸ Ahin deke kekereke nsanm ni kuunri mine n bo bu wo durunya n nu kpaaki nu nsan bukun n a, bere la sin, ni nmisini, ni ferewita n bo i fite bu noo nu ni. ¹⁹ Dama kpongom n yiko kere wo bu noo, ni bu lom nu wo. Bu lom ti ka woom wo, bu la atim, ye bu fa kere mine wahara a.

²⁰ Minem bo ahin wahara n akun ma bu na bu kaari ni, ba kaaki ma bu wo, ba yaki ma amem su, ni dekem bo ba fa sikam, ni jetem, ni jawiim, ni yabuem, ni bakam ayo bu ka bu amem, nyini dekem koro nu ma asi, na bu koro ti ma asui, na bu koro nati ma ni, ba yaki ma bu su. ²¹ Ba kaaki ma bu wo fa ko kabo bu kun minem ni, ni kabo bu di ayiri ni, ni kabo bu yo sakaraya ni, ni kabo bu wo awie ni.

Mereke ni kadasi kaan n jore

¹ Na ma ɲu mereke fangafɔ be bekun ka i fite angoro sujura ba. Na yinyingu akata i ɲu ka tani deɛ su. Na ayi bo i kpiɛ angoro n abara aye i tii, i nyunu ti ka wiɛ wɔ, na i jaam ti ka sin taferema.

² I bita kadasi kaan be i saa nu, i ti tekeewa a. Na wɔ fa i jaa fomboro atien tieku n su, na wɔ fa i jaa bie atien asien n su. ³ Na wɔ tien fanga su kabo jara ɲuundi ni, na nzue tiɛnwa nso n abo i nu. ⁴ Nzue n tiɛnri kpe nso ni, má m ɲa m kere wɔ, na ma ti akonvi be ɲga angoro. I ɲa, “Má a kere jɔjɔwa n bo nzue tiɛnwa nso n ase ni. Má a kan kere be.”

⁵ Na mereke n bo m ɲuuri i ka i jina tieku n ni asien n su, n aye i saa fomboro su akere angoro, ⁶ na wɔ tan Nyeme bo i la ɲgɔɔ na i wo bere sangá kere ni, yiri bo i yiiri angoro, ni asien, ni tieku, ni deke kere bo bu wo nu ni, na wɔ se ka, “Nyeme ɲminda má kun. ⁷ Ama, sangá n bo mereke nso su n ba sukan i awiɛ n ye Nyeme asiri nu jore ni yó yiiwa, kabo i yo seeri i akoom bo bu ti i noaniɛ kanfom ni.”

⁸ Na akonvi n bo i jɔjɔri m do angoro n nu n ajojo m do bekun, i ɲa, “Kɔ de kadasi kaan n bo wɔ teke na i wo mereke n bo i jina tieku n ni asien n su n saa nu.”

⁹ Na ma kɔ mereke n do, na ma se i ka, “Fa kadasi kaan n ma m.” Na wɔ se m ka, “De na a kpɛɛ i, i yó u noo nu mamari ka wiɛ wɔ, ama, i to u kunnu, i yó wiwi wɔ.”

¹⁰ Na ma de kadasi kaan n mereke n do, na ma kpɛɛ i. I ti mamari m noo nu ka wiɛ wɔ, m miiri na wɔ yo wiwi m kunnu. ¹¹ Na wɔ se m

ka, “Kaaki jɔɔ sam bo Nyeme ase ka bu bá tu mine barasu dɔŋgu, ni daanfɛ barasu dɔŋgu, ni nfemem dɔŋgu.”

11

Daanidifo nnyɔm jɔɔɛ

¹ Na ba fa deke be bo bu bita sunsun ama m, i ti ka kpama a, na ba se m ka, “Kɔ sunsun Nyeme Sereebiri Awuru n ni Mikun n yoowa yoobiri ni, na a kan minem bo bu wo nu dɔ su Nyeme ni.

² Ama, má a sunsun awɔɔɛ n bo i bara yɛɛri Nyeme Sereebiri Awuru n kɛɛ na ba ta kobe abara ayɛ i n buka su, dama ba fa nyini fofoe n ama minem bo bu su má Nyeme ni, na bu náti saaki Nyeme mie casi ni, sara aburana ni nnyɔ afien. ³ M súnma m daanidifo nnyɔm ni, na bu fá bɔɔ kara ka tani dɛɛ su, bo i kere ka bu wo ahoresaaki nu, na bu kán m nɔaniɛ n kere minem, nyini cɛɛn akpii kun ni yaa nnyɔ ni aburasen n nu.”

⁴ Daanidifo nnyɔm ni, bɛɛ la ŋguinmbaa baka nnyɔm, ni fitana takaabiri nnyɔm bo bu jina Nyeme bo i dɛɛ la asien nyunu ni. ⁵ Sɔnɔ kɛɛ bo i koro ka i yo bu sa be, sin fite bu nɔɔ nu ba yara bu kpɔfɔm. Nyini ti, nzen be ŋa i yo bu sa be, kabo i ti ye ni ka i wu lɛɛ. ⁶ Bu la yiko bo bu koro kanda nzue aŋgoro na má nzue tɔ, saŋga bo bu wo Nyeme nɔaniɛ n kan su ni, na bu la yiko bo bu koro ma nzuem kaaki mbunja, na bu kaaki la yiko bo bu koro ma alɔɔba tɔ durunya n nu, saŋga kɛɛ bo bu koro.

⁷ Nzen bu ba diiri bu daani kaanri Nyeme jɔɔɛ n wieeri, na boro nenɔndɔɔɛ n bo i fite kunma

n bo i kɔ ɲoɲo na i la má awieeri ni kún lue ni bere, na i kúnma bu, na i kún bu. ⁸ Na bu fuin ká da miɛ bambaka n atin aɕen. Nyini miɛ n nufɔm sayoowa ti tie wɔ, nyini ti ye bu fa bu sunsun Sodomfɔm wara Ijipitifɔm n a. Nyini miɛ n nu ye minɛm kpamaari bu Mibiɛ baka jaanu n su n a. ⁹ Bu fuin ni ká da bere lesan ni wiɛ sin, na minɛm, ni daanɕiɛm, ni aniɛm, ni asienm kere bo bu wo durunya n nu, bu nu nbem sín na bu niɛ bu, na bu dú má su na be se bu. ¹⁰ Bu yiwee n dɛɛ ti, durunya n nufɔm síri taari, na bu gó aɲɔɛ, na bu cé bu beɲgum aceerim, dama nyini Nyeme ɲɔaniɛ kanfɔ nnyɔm bo ba wu n akere bu kere wuwuruwa.

¹¹ Lesan ni wiɛ sin n dɛɛ sin, na Nyeme ayi i ɲumi bo i ma ɲɔɔ n aɲɔ bu ɲu, na ba yasu ajina, na sere ati sɔnɔ kere bo bu ɲuuri bu ni. ¹² Na bere Nyeme ɲɔaniɛ kanfɔ nnyɔm n ati akonvi bambaka be ka i jɔjɔ aɲgoro nu, i ɲa, “Am fun bra aɲgoro fɛn.” Na ba wura yinyingɲu n nu akɔ aɲgoro, bu kpɔfɔm jina suniɛ bu. ¹³ Jina n nu bere na asien akpisi faɲga su, na miɛ bambaka n kpaaki nu buru buekun afufu, na wɔ kun mine akpii nso, na sere ati minɛm bo bu kaari ni, na bu sukansi Nyeme bo i wo aɲgoro ni.

¹⁴ Tɔ. Na nnyɔ su dɛɛ ahoresaaki n gusu asin, bo i tɔ su nsan su ni suba kisa.

Awie nso su n jɔɛ

¹⁵ Na mereke nso su n akan i awie ni, na akonvim atien faɲga su aɲgoro n nu, bu ɲa, “Durunya n nu femeya kere faɲga ti ya Miceɲa ni Kristo Tiidefɔ n dɛɛ wɔ. I dɛɛ femeya ni wó bere saɲga kere a.”

16 Na nkpienkpien aburanyo ni nnam n bo bu tana bu femeya biem su Nyeme nyunu n ada bu nyunu su asiengu na bu subo tuntun Nyeme.

17 Bu na,

“Ya Mi Nyeme Kpiri bo a la má anusu ni,
woro bo a wo bere na a yo woori bere ni,
ya da u asi, dama a de u yiko bambaka n
ye a sunie durunya n kere su a.

18 Durunya n nufom kere afa yaa,
ye sangá aju bo u gusu ahore ayasu,
na a dí minem bo ba wu n jore.

Na sangá n akaaki aju bo a tó u akoom nkato,
bere bo bu ti Nyeme noanie kanfom ni,
ni u minem kere bo bu su u ni,
nfangafom ni tarakam kere.

Ye sangá n akaaki aju bo a saaki bere n bo bu saaki durunya ni.”

19 Na Nyeme Sereebiri Awuru n bo i wo angoro n ateke, na ma nu Nyeme alaka n bo i kereeri ka wo fa sese su adi i di n ka i wo do, na nzue sukpele na i sutenantien, na i suyo nanmie, na asien sukpisi, na nzue yabue ngbingbiri sutoto.

12

Bara ni Sitana n dee jore

1 Na alekutura sa be ayo angoro do. Bara be awo do, wo fa wie akara ka tani dee su, na sara gusu awo i jaa bu, asarambaa buru ni nnyo butu i tii ka femeya kere dee su. ² I bita akunnu, na baawu yaari afa i na i subo awie.

³ Na alekutura sa be gusu ayo angoro do, m nuuri woo tie kokore bambaka be, i tii ti nso wo,

na i la mbie buru, femeya kere nso butu atii nso kun kun n kere su. ⁴ Na wo fa i lo abaandi asarambaam kpaaki nu nsan buekun aji asienngu. Na wo ba ajina bara n nyunu, adena i wuuri baa n na i kaba fa baa n mi. ⁵ Na bara n awu baabieso, bo i ba nie daanfie daanfiam kere su, na i bita bu kekereke kabo nanjasi fa bulaari koroma tu bo i naanim barasu ni. Na ba fa baa n ako yiri Nyeme ni, i femeya tanaabiri n do. ⁶ Na bara n anmati ako boro kpantain awore be nu, bo Nyeme asese i su ama i na bu sunie i dika haari ko ju een akpii kun ni yaa nnyo ni aburasen.

⁷ To, na Nyeme mereke Mikali ni i jamam, ni woo tie ni i dee jamam sukun lue ni bu benngu angoro. ⁸⁻⁹ Ama, na Mikali ni i dee jamam n akunma woo tie n ni i dee jamam ni, na ba fon bu afite angoro, ba nya ma woobiri do kun. Na ba fa woo tie bambaka n ni i dee jamam n kere aji asienngu. Yiri ti dada dee woo tie n a, yiri la Sitana, bu kaaki fere i ka Dadakafu, yiri dadaka durunya n nufom kere n a.

¹⁰ Na ma ti akonvi bambaka be nga ka i sutien fanga su angoro. I na,
 “Kisa, ya nu kabo ya Nyeme n la fanga na i de i minem tii ji,
 na i di i femeya ni.

Kisa, ye Kristo Tiidefo n akere i yiko a,
 dama ba fon ayi Sitana angoro aji durunya n nu fen,
 yiri bo i ti saakifo na i jina Nyeme nyunu
 na i jaraki ya ninbaam kongue ni wiesu ni.

¹¹ Bombaa n dee mbunja, ni bu daani diiwa
 ye bu fa kunmaari i a,

ba soro má bu yiwee,
 bu soroori su wɔ, ka bu wu.
 12 Nyini ti, angoro ni amɛɛ kere
 bo am wo angoro ni,
 am ma am ahore jɔ,
 dama Sitana la má am fanga kun.
 Ama, ahoresaaki bá tɔ asien n ni tieku n su,
 dama Sitana ajura am dɔ.
 Yaa ti i agaya,
 dama i si ka i sanɔ sunnu má kun.”

13 Sanɔ bo woo tie n ɲu ka ba yi i angoro aji
 asienɔ ni, na wɔ nya ɲmati afɔn bara n bo i
 wuuri baabiesɔ n ka i tara i. 14 Ama, na Nyeme
 ama bara n kajiri bambaka lanɔkɔɛ nnyɔ, adena
 i tu kɔ boro kpantain n awɔɛ n bo wɔ sɛsɛ su
 ama i ni, na i nie i dika afɔ nsan ni kpaaki nu,
 na má woo tie n tu i. 15 Na woo tie n apuuti nzue
 afite i nɔɔ nu ka wɔmbu nzue dɛɛ su, na má i
 sɔ bara n kɔ. 16 Ama, na asien n ade bara n aji,
 i kpaaki nu nnyɔ ɔ, na nzue n bo i songi fiteeri
 woo tie n nɔɔ nu n awura asien bu, nyini ti, nzue
 n atu má bara ni. 17 Woo tie n atu má bara n dɛɛ
 ti, na yaa ati i agaya, na wɔ kaaki ka i kɔ kun lue
 ni bara n busu nufɔm, bo ba de Nyeme nɔaniɛ
 maawam n na bu di daani ni Yesu labari kpa n
 ni. 18 Na woo tie n akɔ ajina tieku n nɔɔ su.

13

Boro nengendɔɛ nnyɔm jɔɛ

1 Na ma ɲu boro nengendɔɛ be ka i sufite
 tieku n nu, i la atii nso wɔ, na i mbie ti buru,
 mbie n kere butu femɛya kere, ye duma kerɛɛwa
 be bo i kpie Nyeme nzuko n wo atii kun kun n

kere su. ² Boro nengendore n bo m njuuri i n ti ka awoba a, ama, i jaa ti bambaka, na i la fanja, na i nɔɔ ti ka jara deɛ. Woo tie n afa i deɛ yiko, ni i femeya, ni i fanja afa ama i. ³ Na ma nju ka ba kpie boro nengendore n kun tii, i ti ka ba kpie i kɔm wɔ, ama, kani n awie, na wɔ yo durunya n nufɔm kere alekutura na bu susu i su. ⁴ Na bu kere sukutu na bu su woo tie ni, dama wɔ fa i yiko ama boro nengendore ni, na bu sukutu na bu su boro nengendore n gusu, na bu suse ka, “Nma ti ka boro nengendore n a? Nma ni yiri koro kun lue na i kunma i a?”

⁵ Na ba ma boro nengendore n atin ka i jɔɔ kpiri koroya jɔɔori, na i jɔɔ wura Nyeme ngasi nu, na ba ma i atin ka i la yiko haari sara aburana ni nnyɔ. ⁶ Na i jɔɔ sukpie Nyeme nzuko, na i susaaki i duma ni i dika ni, ni bo bu wo Nyeme dika n nu angoro n kere. ⁷ Na wɔ nya yiko ka i kun lue ni Nyeme minem na i kunma bu, na wɔ kaaki anya yiko na i nie adamande kere, ni daanfie kere, ni aniem kere, ni asien barasu kere bo bu wo durunya n nu. ⁸ Minem kere bo bu wo durunya n nu ni su i wɔ, má ka minem n bo ba du mɔ akere bu duma ago ngɔɔ kadasi n nu, na durunya n boori i bu ni. Kadasi n ti Bombaa n bo ba kpie i kɔm n deɛ wɔ.

⁹ Sɔnɔ kere bo i koro ka i ti ahin jɔre n bu, i ti ye ni ka i mi so i sui na i ti.

¹⁰ “Sɔnɔ kere bo Nyeme ase ka bu wura i dan-saraka,
 bu wúra i wɔ,
 na sɔnɔ kere bo Nyeme ase ka bu kun i ni takobe,
 bu kún i wɔ.”

Nyini dɛɛ ti, i ti ye ni ka Nyɛmɛ minɛm fa sawɔrɛ ni mindi ni yarada na bu fa su Nyɛmɛ.

¹¹ Na ma ɲu boro nɛɲɛndɔrɛ n be bekun ka i fite asiɛn n nu, i la mbiɛm nnyɔ, bu ti kabo Bɔmbaa dɛɛ ti n wɔ, ama, i jɔjɔ kabo woo tiɛ n jɔjɔ n wɔ. ¹² I jina bumboori dɛɛ boro nɛɲɛndɔrɛ n jinaabiri wɔ, na i la i yiko n kɛrɛ, na i sumiɛ durunya n nufɔm kɛrɛ ka bu su bumboori dɛɛ boro nɛɲɛndɔrɛ bo ba kpɛi i tii ni, i ti ka ba kpɛi i kɔm wɔ, ama, kani n awie. ¹³ Na boro nɛɲɛndɔrɛ nnyɔ su n ayo alekutura sam beberebe, na i ma sin fiteeri aɲgoro ba tɔɔri asiɛɲgu wɔ, na minɛm aɲu i. ¹⁴ Alekutura sam n bo i nya yiko yoori bu bumboori dɛɛ boro nɛɲɛndɔrɛ n nyunu n dɛɛ ti, na wɔ dadaka durunya n nufɔm. Na wɔ se bu ka bu ta amɔɛ na i ferema ni boro nɛɲɛndɔrɛ n bo bu faari takobe fɔndɔɔri i ni, ama, i toko la ɲɔɔ. ¹⁵ Na boro nɛɲɛndɔrɛ nnyɔ su n anya atin, na wɔ ma amɔɛ ɲumi, na wɔ nya ɲɔɔ na i koro jɔjɔ na i koro kun minɛm kɛrɛ bo ba kete ka bu su má i ni. ¹⁶ Na i sumiɛ minɛ barasu kɛrɛ, nfangafɔm ni tarakam, nɛɲɛfɔm ni yaarifɔm, minɛm bo ba de bu tii, ni akɔɔm, na wɔ ma ba se bu nyaari bu saa fɔmbɔɔ wara bu ɲuma su. ¹⁷ Sɔnɔ kɛrɛ bo i la má nyini nyaari seewa n be, koro tɔ má deke be na i kaaki koro to má deke be gusu, dama nyini nyaari seewa n ti boro nɛɲɛndɔrɛ n duma, wara i duma lamba.

¹⁸ Sɔnɔ koro si má boro nɛɲɛndɔrɛ lamba n bu, má ka i mi la alecira, i ti adamande duma a. I lamba n ti yaa nsen ni aburasɛn ni nsen wɔ.

14

Bombaa n ni minem bo wo de bu tii aji n jore

¹ Na ma niε aju Bombaa n ka i jina Siyon Buka n su. Mine akpii yaa ni akpii aburana ni nnam wo i do. Bere ye ba kere Bombaa n ni i Si Nyeme duma ago bu numa su n a. ² Na ma ti ka mine nbem sudi jue angoro, i yo nanmie kabo nzue songi na i yo nanmie n wo, na i yo kabo nzue tientien na i yo nanmie ni, na i sun kabo bu bo bieku na i sun barasu ni. ³ Na mine akpii yaa ni akpii aburana ni nnam n jina femeya bie n nyunu, ni nenge ngoofo nnam ni, ni nkpienkpienm n nyunu, na bu sudi jue fofore. Be wo ma bere bo i koro sanson i, ma ka bere ngumi bo Nyeme ade bu afite durunya n nufom n nu ni. ⁴ Bere la minem n bo bu ni bara be ada ma, na bu ti casi ni. Bere la bo deke kere bo Bombaa n ko na bu su i su ni. Bere ye Nyeme ade bu tii aji afite durunya n nufom nu n a, na ba yo i ni Bombaa n dee ciciri su minem. ⁵ Kore be mmoo wo ma bu noo nu. Na bu kaaki la ma ngasi be.

Mereke nsanm jore

⁶ Na ma nu mereke be bekun ka i wo tu su angoro, na i sukan labari kpa n bo i la ma awieeri n jore kere adamande kere, ni daanfie kere, ni aniem kere, ni asien barasu kere bo bu wo durunya n nu ni. ⁷ Na mereke n aye i konvi su atien fanga su agaya ase ka, "Am soro Nyeme na am wura i kpiri, dama sanga n aju bo i di minem jore. Am su Nyeme bo i yiiri angoro ni asien, ni tieku ni nzue ni."

⁸ Na mereke nnyo su n afite asu ciciri deɛ n su, na i suse ka, “Wo kpaasi, Babilon mie kpiri n akpaasi, yiri bo i maari durunya n nufom kere nuuri i nzan n na bu yoori sa ngbeɛnngbeɛn ni.”

⁹ Na mereke nsan su n afite ago ciciri deɛm su. Na i sujojo fanga su suse ka, “Soɔo kere bo i suuri boro nengendore n ni i amoe ni, na wo se bu numa su wara bu saa fomboro su n nyaari, ¹⁰ Nyeme fa yaa bu nu, na i cin bu sui agaya, na i ma sin ni ferewita to bu nu na bu di wahara agaya, i mereke casim n ni Bombaa n nyunu. ¹¹ Na nmisini sufite nyini sin n bo i kere bu wahara n nu ko angoro sangga kere, i la ma awieeri. Minem kere bo bu suuri boro nengendore n ni i amoe n na wo se bu nyaari ni, bu nya ma nanyi, kongue ni wiesu kere.”

¹² Nyini ti, i ti ye ni ka Nyeme minem la mindi, bere bo bu de i noanie maawam ni, na bu bita bu yarada n kenken fa ko Yesu do ni.

¹³ Na ma ti ka akonvi be sujojo angoro suse m ka m kere ka, “Terefie wo minem n bo bu suuri Mibie n na bu wuuri n do fite kisa fa ko.”

Na Nyeme Awiewie Casi n asoro su ka, “I ti nahore wo, bo ba wu ni, bu yi bu nuni, bu nkatɔ ye bu sudi i n a, dama bu sakpayo su bu su a.”

Kabo Nyeme di durunya n nufom kere jore ni

¹⁴ Na ma nie anu yinyingu fofoe be angoro n su, be tana su, i ferema ni adamande wo, i butu sika femeya kere, i bita goroku nana i saa nu.

¹⁵ Na Nyeme mereke n be bekun afite Nyeme Sereebiri Awuru bo i wo angoro n nu, na i sutien fanga su suse yiri n bo i tana yinyingu n su ka,

“Durunya n nu alembaa n abi, fa u gɔrɔku n fa wura nu na a kpɛ i, dama sanɔa n a ju.” ¹⁶ Na yiri n bo i tana yinyingu n su n afa i gɔrɔku n ada awura durunya n nu na wɔ kpɛ alembaa ni.

¹⁷ Na merɛkɛ n be bekun afite Nyɛmɛ Sereebiri Awuru bo i wo anɔoro n nu, i gusu bita gɔrɔku nana be.

¹⁸ Na merɛkɛ n be bekun bo i niɛ sin su afite Mikun yoowa yoobiri n dika, na wɔ tien fanɔa su ase nyini merɛkɛ n bo i bita gɔrɔku n ka, “Fa u gɔrɔku n fa kpɛ durunya n nu baka suuwam ɔ, dama baka suuwa n aboro.”

¹⁹ Na merɛkɛ n afa i gɔrɔku n ada awura durunya n nu akpɛ baka suuwam n kere atien bu nɔɔ aɔ kunma bambaka n bo bu miemi yiiri baka suuwa nzue n nu ni. Nyini kere kabo Nyɛmɛ ahorembaa ayasu na i cin minem sui. ²⁰ Na ba tientien baka suuwa n su, kunma bambaka n bo i wo miɛ n ahɛmɛ n nu, na mbunja asonɔi afite kunma n nu. Nzen kpɔnɔnɔ wura nu, na i kɔ se ka wɔ dodo nɔnɔ dika, i tii nyaari nɔgumi kɔ ka. I tintiin gusu waari agaya.

15

Merɛkɛm bo bu bita awieeri su kekereke ayaba nsom jɔɛ

¹ Na ma nɔ alekutura sa bambaka be anɔoro, ka Nyɛmɛ merɛkɛ nso nbem bita kekereke barasu nso n bo bu ti awieeri su dɛɛ ni. Nyini kekereke n dɛɛ sin, Nyɛmɛ fá má yaa kun.

² Na ma nɔ deke be, i ti ka nzue bambaka a, i je ka niɛnu wɔ, wɔ sanɔa ni sin. Na ma nɔ minem bo ba kunma boro nenɔndɔɛ n ni, ba

kɔ ayaki i ni i amɔɛ n ni i duma lamba. Bu jina tieku n bo i je ka niɛnu n su, bu bita biɛkum n bo Nyɛmɛ afa ama bu ni. ³ Na ba di Nyɛmɛ akɔɔ Moyisi ni Bɔmbaa n dɛɛ jue, ka,

“Ya Mi Nyɛmɛ Fɛmɛ Kpiri,

wɔrɔ ti adamande kɛrɛ fɛmɛ durunya n nu a.

U sayoowa ti bambaka na i ti alekutura.

U sayoowa kɛrɛ kɔ atin su wɔ, na i ti nahɔrɛ.

⁴ Micɛra, ɲma wo bɛrɛ bo i soro má u a, na i wura má u kpiri a?

Dama wɔrɔ ɲgumi ti casi a.

Adamande kɛrɛ bo bu wo durunya n nu, bu bá kutu u na bu kánsi u,

dama u nahɔrɛ sam n afite fofoe nu.”

⁵ Nyini sin, na ma ɲu Casi Kɛrɛ Casi Sɔɔ n bo i wo Nyɛmɛ Sereebiri Nambue n nu, na i wo aɲgoro n ka bu suteke i. ⁶ Na mɛrɛkɛ nsom n bo bu bita kekereke nsom n afite Nyɛmɛ Sereebiri Awuru n nu, bu wura sutura fofoe papasi, ba fa sika dambara abo bu hoe su. ⁷ Na deke ɲgɔɔfɔ nnam nu kun, afa sika ayabam n nso afa ama Nyɛmɛ mɛrɛkɛ nsom n ni. Ayabam n ayi ni Nyɛmɛ ahorembaa yasu, bo i kere ka Nyɛmɛ bo i la ɲgɔɔ na i la má awieeri n afa yaa agaya.

⁸ Na Nyɛmɛ yiko ni i jirima woowa n ama Nyɛmɛ Sereebiri Awuru n ayi ni ɲmisini, bo be akoro awura má awuru n nu, fa kɔ ju sanga bo mɛrɛkɛ nsom fa kekereke nsom n fa jiiri durunya n nu n kɔ wieeri.

16

Ayabam bo bu kere ka Nyɛmɛ afa yaa n jɔrɛ

¹ Na ma ti akonvi bambaka be nga Nyeme Sereebiri Awuru n nu, i sujɔɔ mereke nsom do, i na, “Am ko na am ko kaaki Nyeme ahore yasu ayaba nsom n go durunya n nu.”

² Na mereke ciciri su n ako akaaki i ayaba n ago durunya n nu, na kani tiem, bo bu yo ya agaya, akpie minem bo bu la boro nenjendore n nyaari seewa n na bu su i amoe n ni.

³ Na mereke nnyo su n akaaki i ayaba n ago tieku nzue n nu, na tieku nzue n akaaki ka sono bo wo wu mbunja. Na deke ngoofo kere bo bu wo tieku n nu awu.

⁴ Na mereke nsan su n akaaki i ayaba n ago kunmam nzue ni buram nzue nu, na i kere akaaki mbunja. ⁵ Na ma ti ka mereke n bo i nie nzue n su n ase ka,

“Nyeme, woro ti casi a,
 woro bo a wo bere na a yo woori bere ni,
 kabo a cin minem sui so ni,
 u sayoowa ako atin su.

⁶ Dama ba kun u dee minem, ni u noanie kanfom na bu mbunja afite,
 ye u gusu ama bu nzuem n akaaki mbunja na bu nu.

I ti ye ni ka a yo bu so o.”

⁷ Na ma ti akonvi be nga ka i fite Mikun yoowa yoobiri n bi, i na,

“Ya Mi Nyeme Feme Kpiri,
 kabo a di bu jore ni, i ti nahore wo, na i ko atin su.”

⁸ Na mereke nna su n akaaki i ayaba, n ago wie n nu, na Nyeme ama i kekere agaya suyara minem ka sin dee su. ⁹ Na sin n kekere ayara minem, na ba kpie Nyeme nzuko, yiri bo i la yiko

na i ma bu di nyini wahara ni, na ba kete ka bu kaaki má bu wo na bu ma i jirima.

¹⁰ Na mereke nnu su n akaaki i ayaba n ago boro nengendore n femeya bie n su, na i femeya asien n kere asi biri didiki. Na minem sukan bu saa, yaari n ti. ¹¹ Kambue n ni yaari n bo i wo bu nu n dee ti, ye bu sukpie Nyeme bo i wo angoro ni nzuko a, haari ni nyini mmoo, ba kaaki má bu wo na bu yaki bu satie ni.

¹² Na mereke nsen su n akaaki i ayaba n ago kunma kpiri n bo bu fere i ka Yufarati n su, na nzue n kere anu, na wo kpie atin ama nfemem bo bu fite wie afiri ni. ¹³ Na ma nu awiewie tie nsan nbem, bu ti ka pontirim wo, kun sufite woo tie n noo nu, kun sufite boro nengendore n noo nu, na kun gusu sufite sono bo wo yi i nu ka i ti Nyeme noanie kanfo n noo nu. ¹⁴ Bu ti Sitana dee awiewie barasu nbem wo, na bu suyo alekutura sam, na bu ko durunya n nu nfemem kere do ko tien bu noo, na bu cici lue nminda ya Mi Nyeme Feme Kpiri n jina ceen.

¹⁵ Ya Mi Nyeme na o, “Am ti fen, m ba ni yo am fura nu ka awiefo dee su wo, terefie wo sono kere bo i nminda fa ko m ba n dee su, i fa ma i nu ti ma, na i wura i sutura, adena ma i nati i bu ngbeen, na ma mine nu i, na nyinse ti i.”

¹⁶ Na Sitana awiewiem n atien nfemem noo dika n bo bu fere i Hiburu anie nu ka, *Amagedon* n ni.

¹⁷ Na mereke nso su n akaaki i ayaba n ago anuma n nu. Na akonvi bambaka be ajojo afite femeya bie n nu, Nyeme Sereebiri Awuru n nu, i na, “Wo yo awie.”

18 Na nzue sukpekpeɛ, na i sutenant, na i suyo nanmie, na asien sukpisi fanga su. Kabo Nyeme yiiri adamande ni, be nya ɲu má nyini asien kpisiwa n ɲusu so. 19 Na mie kpiri n ati nu nsaɲ, na miem kere bo bu wo durunya n nu n atoto, dama Nyeme atenje Babilon mie kpiri n jore su, nyini ti ye wo fa yaa i ɲu, sucin i sui n a. 20 Na lui bambakam kere bo bu da nzue aŋen, ni bukam kere amini. 21 Na nzue yabuem sutoto minem ɲu, i kun kun nonɔɔri la ɲma. Na minem sukpie Nyeme nzuko, dama nzue yabue n bo i toto ni sukere bu wahara agaya.

17

Bara sakara n jore

1 Na Nyeme merɛke nsom n nu kun, bo i bita ayaba nsom n nu kun, aba m do, aba ase m ka, “Bra fen, na m kere u kabo Nyeme cin bara sakara tie n sui ni, yiri bo i tana kunma nzue beberebem n su ni. 2 Yiri ye durunya n nu nfemem akpini i afa ayo bu soma, na wo fa i sakaraya asa durunya n nufom kere, na bu gusu akpini i afa ayo bu soma.”

3 Na Awiewie Casi n dee yiko nu, na merɛke n afa m ako boro kpantain nu. Na ma ɲu bara be ka i tana boro nengendore kokore be su, duma kerewa nbem bo bu kpie Nyeme nzuko n wo boro nengendore n ɲunie kere su. I la atii nso, na i mbie ti buru. 4 Bara n adi sunɲuruya anyonyondi i ɲu, i wura sutura kokore nyunyumi, na wo wura i kom, ni i saam, ni i suim jorokom, ni lalankundim, ni afere

nyunyumim, ni sikam, ni afere fofuem bo bu la go agaya. I bita sika kopu i saa nu, wo yi ni dangba ni i sayoowa ngbeenngbreen n wo. ⁵ Ba kere i asiri nu дума i numa su, nyini дума n bu la ka, Babilon mie kpiri, bo i ti sakaram kere ni, na i kaaki ti saa ngbeenngbreen yofom kere bo bu wo durunya n nu n ni. ⁶ Na ma nu ka bara n anu Nyeme minem mbunja abo, ni minem bo bu di Yesu daani n dee ti na ba kun bu ni gusu mbunja abo.

M nuuri i so ni, na wo yo m alekutura. ⁷ Na mereke n abisa m ka, "Nzu ti ye a ma wo yo u alekutura? M kere u asiri nu jore bo i wo bere fa ko bara n ni boro nengendore n bo bara n tana su, na i la atii nso ni mbiem buru ni. ⁸ Boro nengendore n bo a nuuri i ni, ti deke bo i yo woori bere wo, ama, kisa i wo ma bere kun. Wo ka kaan na i fite kunma ngongo n bo i la ma awieeri n nu, na i ko di wahara na i ka ngbeem. Na durunya n nufom bo bu дума wo ma ngoo kadasi n nu, fite sangha bo Nyeme nya yi ma durunya ni, bu ba nuuri i, i yo bu alekutura, dama i yo woori bere, ye kisa, i wo ma bere kun, na i ba kaaki ba ceem be.

⁹ Nyini dee ti, sono kere fa i alecira ni sunsunni na i ti ahin jore n bu. Boro nengendore n tii nso n ti buka nso bo bara n afun atana su wo. Bu gusu kaaki ti nfemem nso wo. ¹⁰ Bu nu nnu akpaasi, nsen su n toko wo bere, nso su n nya ba ma, ama, i ba baari, i ce ma, i femeya ni kpaasi wo. ¹¹ Boro nengendore n bo i yo woori bere, ama, kisa i wo ma bere kun ni, yiri ti feme n bo i buka su mocue

su n a, ama, i ti nfeme nsom nu kun wɔ, na i kó di wahara na i ká ngbɛɛn.

¹² Mbie burum bo a ŋuuri bu n ti nfeme burum bo bu nya di má femeya, ama, bu nyá yiko na bu dí femɛ buka boro neɲgendɔre n su saɲga kaan so. ¹³ Nyini nfeme burum n yó bu nɔɔkun, na bu fá bu faɲga ni bu yiko kere na bu fá ma boro neɲgendɔre ni. ¹⁴ Bu kún lue ni Nyeme Bombaa ni, ama, i ni i minem ni kúnma bu, dama yiri ti mibiem kere Mibiɛ, na i ti nfemem kere Feme. I minem bo bu wo i dɔ n la bo wɔ fere bu ni, ni bo wɔ yi bu na bu jina i sin nahore su ni.”

¹⁵ Na merɛke n ase m ka, “Kunmam nzue n bo a ŋuuri i ni, na bara sakara n tana su ni, ti durunya n nu minem, ni durunya n nu asien barasu barasu kere, ni daanfie kere wɔ lɛɛ. ¹⁶ Mbie burum bo a ŋuuri bu ni, ni boro neɲgendɔre ni, bu bá kpɔ bara sakara ni, bu dé i neɲge kere na i ká i bu ngbɛɛn, na bu dí i ŋuniɛmbaa kere, na bu yára bo wɔ ka n sin. ¹⁷ Dama Nyeme maari bu yoori kabo i koro a. I maari bu yoori bu nɔɔkun na bu fa bu femeya n kere buka boro neɲgendɔre, na i dí femeya n kɔ ju saɲga bo Nyeme noanie ni bá yo yiiwa ni.

¹⁸ Bara n bo a ŋuuri i n la mie kpiri n bo i ti durunya n nu nfemem kere tii n a.”

18

Kabo Babilɔn mie kpiri n kpaasi barasu ni

¹ Nyini sin, na ma kaaki aɲu merɛke be ka i fite aɲgoro sujura, i la yiko agaya, na i woowa n

ata wein abara aye durunya n kere. ² Na wo ye i konvi su atien fanja su ka,

“Wo kpaasi. Babilon mie kpiri n akpaasi.

Wo kaaki awiewie tiem, ni ajinim,

ni deke ηgbεεηηgbεεnm,

ni anuma tiem woobiri wo.

³ Dama durunya n nufom kere nuuri i nzan ye bu koori somaya yiri do a.

Na durunya n nu nfemem kere ko kpiniiri yiri yoori bu soma.

Na kabo i la ajekε na i koro tara ma i ηu ni, durunya n nu watafom gusu nya bu ajekε fite i do o.”

⁴ Na ma kaaki ati akonvi be ηga bekun, ka i sujoko angoro n nu, i ηa,

“M minem, am fite mie n nu,

na ma am yo bu satie yoowa n be,

na ma wahara n bo i suba bu do n tu am.

⁵ Dama mie n nufom satie yoowa n aju Nyeme do angoro,

na i wara koro fi ma bu satie yoowa n sa.

⁶ Sam bo bara n yoori bu ni, yo i gusu so, to i kaari i ηusu nnyo.

Ma i ηu kekereke tara kabo i yo ma minem ηuuri kekereke ni.

⁷ Kabo i yo wuraari i ηu kpiri na i diiri i tii barasu ni,

kere i kekereke na i ahore gusu saaki so.

Dama i ηa, ‘Ma di femε, m ti ma kunafε, m ahore saaki ma cen be.’

⁸ Nyini δεε ti, lekun ye kekereke ba to i ηu a.

Yiri la tukpaki, ni ahoresaaki, ni ahεε.

Na sin yara i,

dama Micera Nyeme n bo i cin i sui n la yiko agaya.”

⁹ Na durunya n nu nfemem bo bu ko kpiniiri i na bu ni yiri diiri bu tii ni, bu nu kabo sin je i, na bu nu kabo nmisini yasu ko angoro barasu, na bu sun, na bu bo awie. ¹⁰ Kekereke n bo wo tu i n dee ti, i ma bu sere wo, na bu jina dede, na bu nya suse ka,

“Keto, keto, am nie ahin mie bambaka ni.
Babilon bo i ti mie kpiri n lee
ye ba kaba acin i sui, ye i kere aka ngbeen,
anyumbaa kata ni i teke n nu bere n a.”

¹¹ Na watafom bo bu wo durunya n nu ni susun, na bu sukoko mie ni, dama be to ma bu goori n kun. ¹² Be to ma bu sika, ni jete, ni afere barasu nbem bo bu yo nyumi na bu la go ni. Be to ma bu suturam barasu barasu bo bu yo nyumi na bu la go ni. Be to ma bu bakam bo bu fa yo bie kpakpam ni, ni bu ayaba barasu kere bo bu fa sui jee yo bu ni, ni deke kere bo bu fa baka fa sense bu, ni deke kere bo bu fa jawii bulaari, ni yabue fa yo bu na bu la go agaya. ¹³ Be kaaki to ma bu toro nenje barasum bo bu la nvanvani, ni ayiri kunkuunwa nvanvani, ni baka nyunvuin nvanvanifo, ni nzan, ni nguin, ni krono samene, ni diire, ni naanim, ni nbem, ni krongom, ni krongo torokum, ni akom, ni domuem. ¹⁴ Na watafom n ase i ka,

“Dekem bo a yo koro bu agaya n kere
anmati ayaki u,
u ajekem, ni u nenje kpakpam kere bo a la bu
ako ayaki u,
a nya ma i be kun.”

15 Watafom bo bu yoori nengefom nyini mie n deε ti ni, bu kó jina dede wɔ, dama sere ti bu fa kɔ kekereke n bo wɔ tɔ mie n nu ni, na bu ahore saaki agaya na bu sun. 16 Na bu se ka,

“Keto, keto, am nie ahin mie bambaka ni.
I yo kara sutura barasu barasu nyunyumi,
na i la sika jorokom,
ni aferem barasu barasu
bo bu yo nyumi na bu la go agaya ni.

17 Nyini nenje n kere akaba aka ngbeen,
anyumbaa kata ni i teke n nu bere n a.”

Na lee bambaka kanfom, ni leefom, ni lee wurafom, ni bo bu juma nati tieku nzue n su n kere akɔ ajina dede. 18 Na bu jina nie kabo mie ni suje sin barasu na nmisini yasu kɔ angoro ni, na bu bo awie se ka, “Mie bono wo bere bo i ju ahin mie bambaka n a?”

19 Na bu susasa tuturi go bu tii su na bu kere ka bu ahore asaaki agaya, na bu susun, na bu suse ka,

“Keto, keto, am nie ahin mie bambaka n ni.
Dama minem kere bo bu la lee bambakam na bu juma nati tieku nzue n su n
nya bu nengem fite nyini mie n deε ajeke n nu wɔ.

Ye wɔ kaba aka ngbeen,
anyumbaa kata ni i teke n nu bere n a.

20 Ambere bo am wo angoro nu,
ni Nyeme minem, ni Yesu jaramasam, ni Nyeme noanie kanfom,
am ma am ahore jo
fa kɔ kabo mie kpiri n aka ngbeen barasu
bere ni,
dama Nyeme subisa i noo nu ma am a.”

21 Na Nyeme mereke fangafɔ be n afa yabue bambaka, na wɔ fa atu aji tieku nzue n nu, na wɔ se ka,

“So ye Nyeme fá Babilɔn miɛ kpiri n
fa ji wuum a,
na i busu be bá ŋu má.

22 Be ti má deke be ŋga miɛ n nu kun,
i bieku kanfɔ o, i jue difɔ o, i tere kanfɔ o, ni
awie kanfɔm.
Na jumayofɔ barasu be mmɔɔ gusu wo má
miɛ n nu kun,
be ti má ŋgani san yabue be ŋga miɛ n nu
kun.

23 Na fitana haari kun n kpein
je má miɛ n nu cɛɛn be na be ŋu i.
Be ti má konya ni konyafan kuyigindi ŋga miɛ n
nu kun,
dama watafɔm bo bu yo wo nyini miɛ n nu
yo ti nfangafɔm wɔ durunya n kere nu,
na miɛ nufɔm yo boboyaya sam dadaka durunya
n nufɔm kere.

24 Nyeme acin miɛ n nufɔm sui a,
dama bere yo kuunri Nyeme minem, ni i
noaniɛ kanfɔm n a,
ni minem kere bo ba kun bu durunya n nu
ni, bere yiiri bu mbunja.”

19

1 Nyini sin, na ma ti akonvi be ŋga angoro, ka
jama beberebe akonvi, bu ŋa,
“Haleluya, ya kansi Nyeme,
ya Mi Nyeme n ama ya nya tiide a,
yiri ti kpiri ni yikofɔ a.

2 I di jɔre ni i atin su, ni nahɔre wɔ.

Wɔ di bara sakara n jɔrɛ,
 yiri bo i maari durunya n nufɔm kɛrɛ kpini
 nbaram
 na bu kɔ somaya
 na bu yo sa ŋgbɛɛnŋgbɛɛnm kɛrɛ,
 na wɔ cin i sui, dama yiri yo kuunri Nyɛmɛ
 akɔɔm n a.”

³ Na jama n bo bu wo aŋgoro n akaaki ayɛ bu
 konvi su atien ase ka,
 “*Halleluya.*”

Sin n bo i sudi miɛ ni ŋmisini n suyasu suko
 aŋgoro
 haari ni saŋga bo i la má awieeri.”

⁴ Na nkpiɛnkpiɛn aburanyɔ ni nnam, ni deke
 ŋɔɔfɔ nnam sukutu sukansi Nyɛmɛ bo i tana
 femɛya biɛ n su ni, na bu se ka,
 “*Ami. Halleluya.*”

Nyɛmɛ Bɔmbaa n konyaya jɔrɛ ni

⁵ Na akonvi be afite femɛya biɛ n nu, i ŋa,
 “Amberɛ Nyɛmɛ akɔɔm kɛrɛ,
 tarakam ni nfaŋgafɔm,
 bo am soro Nyɛmɛ ni,
 am kɛrɛ kansi i duma.”

⁶ Na ma ti akonvi be naŋmiɛ ŋga, i ti ka jama
 beberebe suyo naŋmiɛ wɔ, na i yo naŋmiɛ, kabo
 nzue soŋgi na i yo naŋmiɛ ni, na i kaaki ti kabo
 nzue tientien na i yo naŋmiɛ ni, i ŋa,
 “*Halleluya,*

Ya Mi Nyɛmɛ Fɛmɛ Kpiri n
 adi i femɛya n kisa.

⁷ Am ma ya ahore jɔ na ya yo ya kunnu koroowa,
 na ya wura i kpiri,
 dama saŋga n aju bo Bɔmbaa ni já i konya ni,

konya n gusu asese i ɲu su aɲminda i.

⁸ Nyeme ama i sutura casi fofoe papasi ka i fa kara.”

Sutura fofoe papasi n la Nyeme minem sakpa yoowam ni.

⁹ Na merexe n ase m ka m kere ka, “Terefie wo minem bo Bombaa n abaandi bu ka bu ba di konyaya diire n be i do.”

Na wo kaaki ase ka, “Ahin noanie ti nahore wo, i fite Nyeme do o.”

¹⁰ Na ma kutu i jaa bu asienɲu ka m su i, na wo se m ka ma m yo so, ama, m kansi Nyeme ɲgumi. Na wo kaaki ase m ka, “M ti u bengu akoo, ni u ninbaam bo bu di Yesu daani kere mine n be wo.” Jore n kere bo Nyeme noanie kanfom kaanri i ni, bu diiri ahin Yesu n daani wo.

Sono n bo i fun kpɔngɔ fofoe n jore

¹¹ Na ma ɲu ka angoro ateke, kpɔngɔ na ma ɲu kpɔngɔ fofoe be, bu fere bo i tana su n duma ka, Bo i la Dabuɲu ni Nahorefɔ, i di minem jore kabo i ti ye ni ka i di bu nahore su wo, na i kun i lue ni nahore su. ¹² I nyumbaa kere je ka sin fofoe, na i butu femeya kere beberebe i tii su. Duma kerewa be mata i, be si ma nyini duma ni, ma ka yiri ɲgumi si a. ¹³ I wura sutura yorom barasu be bo ba fa i awura mbunja nu, na bu fere sono n duma ka Nyeme Noanie. ¹⁴ Na Nyeme sojam bo bu wo angoro n fun kpɔngɔ fofoe su i su, bu wura sutura casi fofoe papasi. ¹⁵ Takobe nana bo i fa kunma durunya n nufom wo i noo nu, na i bita bu kekereke kabo nanƙasi fa bulaari koroma tu bo i naanim barasu ni, na i tɛntien bu su kabo bu fa baka suuwa go kunma nu na bu

miemie yi i nzue ni, dama Micera Nyeme Kpiri n afa yaa agaya. ¹⁶ Ba kere i duma i sutura n su, ni i jaa soowa su ka, “Nfemem kere Feme ni mibiem kere Mibie.”

¹⁷ Na ma nu mereke be ka i jina wie n su, na wo ye i konvi su atien fanga su ase anumam kere bo bu tu angoro na bu di nie n ka, “Am bra na am ba tien am noo na am di ahin diire beberebe n bo Nyeme sufa ma am ni, ¹⁸ am ba di nfemem juniembaa, ni sojam nkpienm juniembaa, ni nfangafom juniembaa, ni kpongɔ nie, ni minem bo bu fun kpongom n juniembaa, ni adamande barasu kere juniembaa, bo bu ti akoom ni bo ba de bu tii, ni bo bu ti mine ngbingbirim, ni bo bu ti mine kan kanm ni.”

¹⁹ Na ma nu boro nengendore n ni durunya n nu nfemem, ni bu sojam, ka, ba tien bu noo acici na bu kun lue ni yiri n bo i tana kpongɔ fofoe n su ni, ni i jama nbaam. ²⁰ Na ba tara boro nengendore n ni korefɔ n bo i yo i nu ka i kan Nyeme noanie ni. Yiri yo yoori alekutura sam boro nengendore n nyunu, na wo dadaka minem bo bu deeru boro nengendore n anyaari seewa na ba su i amoe ni. Na ba fa boro nengendore n ni korefɔ n ni bu ngoo aji sin n nu, bo i je ka ferewita na i da ka tieku ni. ²¹ Minem bo bu kaari ni, na yiri n bo i tana kpongɔ n su n afa takobe n bo i wo i noo nu n akun bu kere. Na anumam kere adi nie na bu kunnu ayi.

20

Kabo bu nyi Sitana afɔ akpii kun n jore

¹ Na ma ɲu merɛkɛ be ka i fite aɲgoro suba, i bita deke nbem i saa nu, kun la kadombaa bo i tu kunma ɲoɲo bo i la má awieeri ni, na kun gusu la jɔɔkɔ bambaka fangafɔ be. ²⁻³ Na wɔ tara woo tiɛ ni, dada dɛɛ woo tiɛ n bo i ti Sitana ni, na bu kaaki fere i ka Dadakafɔ ni, na wɔ fa jɔɔkɔ n acici i, na wɔ fa i atu kunma ɲoɲo n bo i la má awieeri n nu, ka i wó dɔ haari afɔ akpii, na wɔ tu kunma n aɲo ni, na wɔ ta akata su, na má i koro fite na i dadaka durunya n nufɔm bekun, ama, i wo dɔ haari afɔ akpii n ba ju. Nyini sin, na bu nyáŋgi i ji kaan.

⁴ Na ma ɲu femɛya biɛm, Nyɛmɛ ama bo bu tana sum n atin ka bu di minɛm jɔɛ. Na ma kaaki aɲu bɛɛ bo bu yo wuuri Yesu ti ni. Mine yo kpiɛɛri bu tii a, dama bu yo kaanri Nyɛmɛ jɔɛ na ba di Yesu daani n dɛɛ ti. Bɛɛ keteeri ka bu su má boro nɛɲɛndɔɛ n ni i amɔɛ n a, bɛɛ la bo bu kaaki keteeri ka bu de má i nyaari seewa bu ɲuma wara bu saa su n a, ye ba tɛɲɛ bu yiwee n nu anya ɲɔɔ, na bu ni Kristo Tiidefɔ n saɲga di femɛya afɔ akpii. ⁵ Ahin ti yiwee tɛɲɛ ciciri su n a. Ama, minɛm bo ba wu na ba ka ni, bɛɛ tɛɲɛ má haari kɔ ju afɔ akpii n awieeri. ⁶ Bɛɛ n bo bu du mɔ tɛɲɛɛri bu yiwee nu ni, na bu ti minɛ casim n ni, tɛɛfiɛ wo bu dɔ, bɛɛ ɲú má yiwee nnyɔ su n kun, bɛɛ yó Nyɛmɛ ni Kristo Tiidefɔ sayoowa dɔɲguyofɔm a. Na bu ni yiri saɲga di femɛya n afɔ akpii.

Kabo Nyɛmɛ kunmaari Sitana ni

⁷ Afɔ akpii n nyaari kɔ juuri, na Nyɛmɛ má bu yi Sitana n dansaraka sɔɔ n nu ji. ⁸ Na i kó dadaka adamande barasu barasu kɛɛ bo bu wo

durunya n nu ni, Gogi ni Magogi asien n kere, na i tien bu kere noo na bu ko kun lue. Bu sunnu beberebe ka kunma hmiw. ⁹ Na ba tereki abara aye durunya n deke kere, na ba bara aye mie n bo Nyeme koro i agaya ni, deke bo i minem wo ni, ama, na sin afite angoro aba ayara bu. ¹⁰ Na ba fa Sitana n bo i dadaka bu n aji cema sin n nu, bo i je ka ferewita na i da ka tieku ni, deke bo bu faari boro nengendore n ni korefo n bo i yo i nu ka i kan Nyeme noanie n jiri nu ni. Do na bu di wahara, kongue ni wiesu sanja kere.

Kabo Nyeme di minem jore awieeri su ni

¹¹ Na ma nu femeya bie bambaka fofoe be, ni bo i tana su ni. Na angoro ni asienju kere amini i nyunu, bu wo ma bere kun. ¹² Na ma nu minem bo ba wu ni, nfangafom ni tarakam kere, ka bu jina femeya bie n nyunu. Na ma kaaki anu ka be suteke kadasim, na be gusu suteke kadasim bo i ti ngoo de ni. Nyini kadasim ye bu fa diiri minem bo bu wuuri n jore a, bu sayoowa kere bo bu yo yoori wo nyini kadasim n nu. ¹³ Na tieku n aworo minem bo ba wu n ama, na Yiwee, ni Yiweefom Woobiri n aworo minem bo ba wu n ama, na Nyeme afa bu sayoowa bo bu yo yoori adi bu jore. ¹⁴ Na wo fa Yiwee, ni Yiweefom Woobiri n aji sin n nu, bo i je ka ferewita na i da ka tieku ni. Ahin sin ni ti yiwee nnyo su n a. ¹⁵ Na ba fa sono kere bo i duma awo ma ngoo kadasim n nu aji sin ni.

21

Angoro ni asien fɔfɔre n jɔre

¹ Na ma ŋu angoro fɔfɔre ni asien fɔfɔre, dama angoro dawa n ni asien dawa n kere wo má bere kun, na ma ŋu ka tieku nzue n gusu wo má bere kun. ² Na ma ŋu mie casi ni, Yerusalem fɔfɔre n ka i fite Nyeme do angoro sujura ba asienɔgu, wo sese i ŋu su ka konya bo i sukɔ ajaa. ³ Na ma ti akonvi bambaka be ŋga femeya bie n nu, i ŋa, “Am nie fen, Nyeme woobiri wo adamandem do, na i wó bu do.

Na i fá bu yo i minem.

Yiri ni i tii wó bu do na i yó bu Nyeme a.

⁴ Yiri núnuka bu nyunvuin kere bu nyumbaa nu a, yiwee wo má bere kun, ahoresaaki wó má bere kun,

minem sún má kun, na minem dí má yaari kun, dama deke dawam kere asin.”

⁵ Na bo i tana femeya bie n su n ase ka, “Nie fen, m suyo deke kere fɔfɔre.” Na wo kaaki ase m ka, “Kere ahin noanie ni, dama i ti nahore wo, na i la dabuɔ.” ⁶ Na wo se m ka, “Wo yo awie, mini ti mɔfo a, na m kaaki ti kasinfo, mini ti deke kere bumboori ni i awieeri a. Sono kere bo nzuehɔe tiiri i, m má i nu nzue n bo i ma ngɔɔ ni, na i mi tó má kaari. ⁷ Sono kere bo i diiri nasara, m má i ahin aceerim ni, na m yó i Nyeme, na m fá i yo m wa. ⁸ Ama, serefom, ni minem bo ba yo má m yarada, ni dangba yofom, ni mine kunfom, ni nbara kpinifom, ni somaya kofom, ni bo bu di ayiri ngbeennngbeen, ni munzueyifom, ni amɔe sufom, ni korefom kere, bu woobiri la ceema sin

n bo i je ka ferewita na i da ka tieku ni. Nyini yiwee ni ti yiwee nnyo su n a.”

Yerusalem fɔfɔre n jɔre

⁹ Na mɛreke kun aba m do, i ti mɛreke nsom bo bu bita awieeri su dɛɛ kekereke ayaba nsom nu kun wo, na wo ba ase m ka, “Bra, na m kere u Bombaa n konya ni.”

¹⁰ Na Awiewie Casi n dɛɛ yiko nu, na mɛreke n afa m ako buka bambaka n bo i ti lenlenge n tii su, na wo kere m Yerusalem mie kpiri n bo i ti casi ni, i fite Nyeme do angoro sujura ba.

¹¹ Na i je na i ta wein kabo Nyeme jirima woowa n ti ni, na i sujeje kokore ni sosofura nzue ka afere nyunyumi barasu be bo i da cain ka niɛenu.

¹² Ba ta kobe bambaka bo i wo angoro abara aye mie ni, na i la anɔ buru ni nnyo, anɔm kere su la mɛreke kun kun bo bu jina nminda. Ba kere Yisareli anɔ barasu buru ni nnyo n дума ago anɔ n kun kun kere su. ¹³ Kobe n bue nna n kere la anɔ nsan nsan, nsan wo wie afiiri, na nsan wo wie atɔɔri, na nsan nsan wo gbɛɛnngbɛɛn bue nnyo n kere. ¹⁴ Mie n kobe n ajaari seewa yabue n ti buru ni nnyo o, ye bu nya taari kobe n taka su. Ba kere Bombaa n jaramasa buru ni nnyom дума ago yabue n kun kun kere su.

¹⁵ Na mɛreke n bo i jɔjɔɔri m do n bita sika kara i saa nu, bo i fa sunsun nie kabo mie n ti bambaka barasu, ni kabo kobem n anɔm ti tɛtere barasu, na i kaaki sunsun nie kabo kobe n angoro ti barasu. ¹⁶ Mie n ataari n ti ka soo langba dɛɛ su wo, i tintiin, ni i tɛtere kere se wo. Na mɛreke n afa i sika kara sunsunwa n asunsun mie ni, i tintiin su ti kilo akpii nnyo

ni yaa nna wɔ, nyini ti, i tintiin, ni i tɛtɛrɛ, ni i angoro kɛrɛ sɛ wɔ. ¹⁷ Na mɛrɛkɛ n asunsun kobe n gusu, kabo adamande bo ajaari ni, na i angoro akɔ ayasu ka ajaari boowa kun kun kɔ ju yaa ni aburana ni nna. ¹⁸ Bu faari yabuɛ nyunyumi barasu be bo bu fere i ka jasapa ni taari kobe n a, na ba fa sika bo i da cain ka niɛɛnu, ata miɛ n ni i tii. ¹⁹ Yabuɛ n bo bu fa seeri miɛ n kobe n ajaari n ti yabuɛ barasu nyunyumi, na i kɛrɛ busu wo i ŋgumi ŋgumi. I ti kabo Nyɛmɛ sayoowa dɔŋguyofɔ kpɛn n sana i tanlɛɛ su na i wo i hoe su ni. Bu fere bu ka jasapa, ni safiri, ni agata, ni emɛradi, ²⁰ ni oniki, ni caniliya, ni krisolite, ni berili, ni topasi, ni krisoparasi, ni jasinti, ni amɛtisiti. ²¹ Bu faari afere fofoe nyunyumi barasu be fa yoori anɔ buru ni nnyɔm n a. Bu faari sika fa yoori miɛ n atin natiwa kɛrɛ a, na i da cain ka niɛɛnu.

²² Ma ŋu má Nyɛmɛ Sereebiri Awuru be miɛ n nu, dama ya Mi Nyɛmɛ Fɛmɛ Kpiri n ni Bɔmbaa n ade Nyɛmɛ Sereebiri Awuru n jinaabiri a. ²³ Miɛ n koro má wiɛ ni sara na bu ta wein ma i, dama Nyɛmɛ jirima woowa ni ti i wein a, na Bɔmbaa n ti i fitana. ²⁴ Na durunya n nu adamande barasu kɛrɛ sunati i wein nu wɔ, na durunya n nu nfemɛm fa bu ajɛkɛ kɛrɛ ba wura nu. ²⁵ Miɛ n anɔ ni tɛkɛ wɔ sanɔga kɛrɛ, dama ka kɔŋgue wo má dɔ. ²⁶ Na adamande barasu kɛrɛ bo bu wo durunya n nu ni fá bu nɛŋge kpakpam ni bu jirima na bu fá wura nu. ²⁷ Ama, deke kɛrɛ bo i ti má casi wúra má miɛ n nu, ni minɛm bo bu su amɔɛm, ni minɛm bo bu bu kɔrɛm ni. Má ka minɛm bo bu duma wo Bɔmbaa ni ŋgɔɔ kadasi

n nu ni ngumi wúra nu a.

22

¹ Na meréke n akaaki akere m kunma nzue bo i ma ngoo, i da cain kabo nienu ti n wo, i songi fite Nyeme ni Bombaa n femeya bie n nu wo, ² na i susongi mie n atin n afien ni. Kunma n bue nnyo n kere, baka n bo i ma ngoo n jinjina aheme. Na i susu suuwa barasu buru ni nnyo afo kere, sara kere ni i suuwa. Na bu sufa i nyawa n tuntun durunya n nu adamande kere torem. ³ Deke bo Nyeme ayo i noo ngbeen wo má mie n nu. Ama, Nyeme ni Bombaa n femeya bie ni wo do, na i akoom n susu i. ⁴ Bu nu i nyunuawa dika kabo i ti barasu, na i kere i duma go bu numa su. ⁵ Awosin wo má do, be koro má fitana do, na bu kaaki koro má wie do, dama ya Mi Nyeme Feme ni i tii yo bu wein a. Na bu dí femeya bo i la má awieeri.

Kabo Yesu seeri ka i cé má, i káaki ba ni

⁶ Na meréke n akaaki ase m ka, “Ahin noaniem n ti nahore wo, na i ti deke bo sono yo i yarada. Ya Mi Nyeme Feme bo i faari i Awiewie Casi n wuraari i noanie kanfom nu ni, yiri asunma i meréke n ka i ba se i akoom fa ko sa bo i yo kisa bere n a.”

⁷ Ya Mibie Yesu na, “Am so am sui. I cé má, m bá kisa. Terefie wo sono kere bo i deeri noanie n bo i wo ahin kadasi n nu na i joo fa ko sa bo i bá yo n nu.”

⁸ Mini Yohane tiiri, ye m nuuri ahin deke n kere, m tiiri na m nuuri i so ni, na ma kutu meréke n bo i kereeri nyini dekem n jaa bu ka

m su i. ⁹ Na wɔ se m ka, má m yo sɔ, ama, m kansi Nyeme ηgumi. Na wɔ kaaki ase m ka, “M ti u beɲgu akɔɔ, ni u ninbaam bo bu ti Nyeme nɔaniε kanfɔm, ni bo bu de nɔaniε n bo i wo ahin kadasi n nu n be wɔ.” ¹⁰ Na wɔ kaaki ase m ka, má m se ka m fiε nɔaniε n bo i wo ahin kadasi n nu na i jɔjɔ fa kɔ sa bo i bá yo n su, dama i cé má, i kere yó kisa. ¹¹ I ηa sɔnɔ kere bo i yo satie, ma i kɔ su yo i satie, sɔnɔ kere gusu bo i yo i danɲba sa ni, ma i kɔ su yo i danɲba sa ni, na sɔnɔ kere gusu bo i yo sakpa, ma i kɔ su yo i sakpa ni, na sɔnɔ kere gusu bo i ti casi, ma i kɔ su wo i casi wo.

¹² Ya Mibie Yesu ηa, “Am so am sui. I cé má, m bá kisa, na m bá tɔ sɔnɔ kere kaari kabo i jumayoowa ti barasu. ¹³ Mini ti mɔfɔ a, na m kaaki ti kasinfɔ, mini ti deke kere bumboori ni i awieeri n a.”

¹⁴ Terefiε wo minem bo ba ηmisi bu suturam ayo casi n dɔ, adena bu koro nya atin di baka n bo i ma ηɲɔɔ n dεε suuwa ni, na bu fa mie n anɔ n wura mie n nu. ¹⁵ Ama, danɲba yofɔm, ni bo bu di ayiri ηgbeεnηgbeεn, ni bara kpinifɔm, ni somaya kɔfɔm, ni mine kunfɔm, ni amɔε sufɔm, ni bo bu bu kɔre bu nɔaniε jɔjɔowa ni bu sa yoori nu n kere koro wura má mie n nu.

¹⁶ “Mini Yesu asunma m mereke n ka i ba se am ahin jɔre n a, amberε bo am wo Kristo jamam n nu ni. Mini ti Feme Davidi anuma a, na m ti asaakojo bo i ta ni.”

¹⁷ Awiewie Casi n ni konya n ηa, “Bra.”
Sɔnɔ kere bo i ti ahin, ma i mi gusu se ka, “Bra.”
Na sɔnɔ kere bo nzuehɔε ati i,
na i koro ηɲɔɔ nzue ni,

i bra na i ba de nu ηgbεεn.

Awieeri su n jɔre

¹⁸ Mini Yohane subɔbɔ sɔnɔ kɛrɛ bo i ti ahin kadasi n nu jɔrɛ fa kɔ sa n bo i bá yo n lɛɛ, ka sɔnɔ kɛrɛ bo i faari nɔaniɛ be bukaari su, Nyemɛ fá kekereke n kɛrɛ bo i wo ahin kadasi n nu n buka i mi su. ¹⁹ Na sɔnɔ kɛrɛ gusu bo i yiiri nɔaniɛ n bo i wo ahin kadasi n nu n be, Nyemɛ yí i mi n aceeri na i nya má baka n bo i ma ηgɔɔ n dɛɛ suuwa n be, na i má i wura má miɛ casi n nu, kabo ba kɛrɛ bu jɔrɛ ahin kadasi n nu.

²⁰ Yiri n bo i di ahin jɔrɛm kɛrɛ daani n ase ka, “Nahɔrɛ. I cé má, m bá kisa.”

Ma i yo sɔ. Ya Mibiɛ Yesu, bra. Ami.

²¹ Ma ya Mibiɛ Yesu buka Nyemɛ minɛm kɛrɛ. Ami.

ΝΥΣΜΕ ΙΟΡΕ ΚΑΔΑΣΙ
The New Testament in Anufo (Chokosi)

copyright © 2009 Wycliffe Bible Translators, Inc.

Language: Anufo

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022

fe36d0e6-2a60-5e15-8d1c-8bf275389598